



## WINIM K1,000 MAMA FLAME MEKIM BILUM KOMPETISEN

Mekim bilum bilong yu yet wantaim Flame Flour mak. Laikim Facebook peis na postim foto bilong yu wantaim bilum yu karim na yu bai gat sans long winim. (Fopela inap long winim. Wampela long wanwan region)

go to FlameFlourPNG on Facebook



Dairi Vele. PNG i ran long han bilong gutpela gavman.

# Gavman i no sot long mani

**GAVMAN i no sot long mani long ranim dispela kantri, Tre-seri Seketeri Dairi Vele i tok.**

Seketeri Vele i autim dispela toktok asde long 2016 Lidasip Samit long Pot Mosbi long ai bilong ol provinsal gavana, gavman minista, dipatmen seketeri, provinsal administreta, bos bilong ol kampani bilong gavman na ol bisnismaneri.

Mista Vele i tok strongpela disisen bilong gavman long katim daun K2 bilien bilong K16 bilien 2016 Nesanel Baset i kam daun long K14 bilien, em i wampela samting gavman i bin mekim long sevim mani, yusim gut mani long ol nambwan samting tasol, daunim mak bilong dinau na kirapim ikonomi.

"Gutpela ikonmik menesmen bilong Praim Minista Peter O'Neill na ol ikonmik

menesmen tim wantaim 3-pela ikonmik minista i larim gavman i no sot long mani long ranim kantri," Mista Vele i tok.

Dispela i tru bikos gavman i wok long kirapim ol nupela rot, sanapim klasrum, stretim haus sik na givim moa sevis long pipel maski prais bilong ol komoditi i pundaun long intenesenel maket na ol manmeri i wok long tok kantri i sot long mani, em i tok.

Em i tok gavman bai no inap sot long mani sapos ol wan wan gavman dipatmen na stetutori ogenasesen i lukluk long samting ol i nidim stret na yusim mani long ol dispela nambawan samting tasol.

Em i salensim ol gavman dipatmen long bihainim stret 2016 Nesanel Baset na yusim mani long ol prairiti samting

we ol i ting dipatmen, pipel na kantri bai nidim stret.

Maski gavman i no kisim bikpela mani long ol samting PNG i save salim, gavman i wok long toktok wantaim ol stet-on-entaprais (SOE) o kampani bilong gavman long lukluk long ol arapela rot long bringim moa mani i kam insait.

"Mipela i no ken putim ai tasol long maining na petroleum. Yumi mas kirapim turisim, forestri, fiseris na egrikalsa bisnis."

Mista Vele i tok long yia 2012 i kam inap nau, ikonomi bilong PNG i bin gro long 14 pesen na dispela i soim olsem gavman i kamapim ol nupela lo na polisi na kirapim planti ol infrastraksa kantri i nidim long groim ikonomi.

"Mi laik tok tenkyu long Praim Minista Peter O'Neill, Tresera Patrick Pruaitch,

Fainens Minista James Marape na Nesanel Plening Minista Charles Abel.

"Lidasip bilong Praim Minista O'Neill wantaim gutpela tingting na save bilong dispela ol 3-pela ikonmik minista i mekim kantri i ran long gutpela na stretpela rot we bihain taim bilong ol manmeri bilong yumi bai pulap long planti sans long kirapim moa bisnis na kamapim gutpela sindaun," Mista Vele i tok.

Mista Vele i tok PNG i bin kisim ol dinau mani bikos gavman i save long olsem wanem em bai bekim dispela dinau.

"Dinau bilong gavman i stap aninit long 30 pesen. Lo i tok orait long larim Debt tu GDP resio i stap long 35 pesen mak. Na mipela i no abrusim dispela mak.

ritim moa long pes 2

Liklik moni, bikpela toktaim

Kisim long **K49** tasol.



Customer Care 76003555  
support@bmobile.com.pg

Offer valid till 29th of February 2016 or till stocks last.

www.bmobile.com.pg





# O'Neill tok tenkyu long Wol Benk

**PRAIM Minista Peter O'Neill i tok tenkyu long Wol Benk i wok long sapotim PNG.**

Mista O'Neill i makim maus bilong kantri na pipel na salim dispela tok tenkyu i go long Wol Benk taim em i bungim Kantri Menesa bilong Wol Benk long PNG, Steffi Stallmeister las wik.

Long dispela bung, Mis Stallmeister i bin givim ol apdet na ripot bilong ol wok Wol Benk i save mekim long PNG. Praim Minista O'Neill i bin amamas tru taim em i bin lukim dispela ripot.

"Mi tok tenkyu long Mis Stallmeister na olgeta wok manmeri bilong Wol Benk long mekim gutpela wok long PNG na long strongpela sapot Wol Benk i wok long givim long PNG long larim kantri i kirapim ol nesenel developmen agenda," Mista O'Neill i tok.

"Insait long 3-pela yia, Wol Benk i bin kirapim wanpela

patnasip ol i kolim Kantri Patnasip Strateji long helpim PNG i wok bung wantaim Wol Benk.

"Dispela strateji i bin lukim olsem wok bung bilong Wol Benk na PNG Gavman i larim ol manmeri i kisim wankain benefit long ol developmen gol bilong PNG.

"Taim kantri bilong yumi i wok long senis i go kamap wanpela nupela na moden kantri, ikonomi bilong kantri i wok long bringim planti nupela salens insait long liklik taim tasol.

"Mi tok tenkyu long Wol Benk long gutpela wok ol i mekim long strongim ol kepasiti bilong ol meri long olgeta hap bilong dispela kantri.

"Helpim bilong Wol Benk i lukim planti ol meri bilong yumi i gat sans long sanap strong olsem ol man na mekim sampela gutpela wok long kirapim ikonomi bilong PNG.

"Fainensal inklusen em i wanpela gutpela samting

Wol Benk i bin kirapim long PNG na nau ol meri i gat sans long opim nupela benk akaun na kisim ol dinau mani long satim bisnis.

"Wol Benk i wok long mekim moa samting. Ol i wok long helpim ol manmeri i gat sans long kisim ol nupela infomesen na ol i wok long givim intenent na ol samting bilong kompiuta na data long ol pipel bilong yumi.

"Wol Benk i wok long sapotim ol yangpela meri na yut long ol siti na taun long kisim trening na sampela moa save long helpim ol i redi long painim ol wok," Mista O'Neill i tok.

Mista O'Neill i tok sampela ol biknem ogenesesin olsem Wol Benk i save bringim moa save i kam insait long PNG na ol pipel bilong dispela kantri i lukluk go het yet long strongim dispela patnasip na pasin bilong wokbung wantaim long larim PNG i kamap wanpela gutpela kantri.

# TISA winim K13 milien propit long 2015



**L-R Siaman bilong TISA Sevings na Lons Sosaiti, Gabriel Tai na CEO Michael Koisen i sanap long fran bilong Mep bilong PNG we i gat mak bilong ol hap we ol brens bilong TISA i stap long en. Foto: Frieda Sila Kana.**

TISA Sevings na Lo Sosaiti i abrusim taim no gut na kamapim K13 milien na moa propit o win mani moa long givim long ol ol memba bilong ol insait long fainensal yia 2015.

Siaman bilong TISA Sevings na Lons Sosaiti, Gabriel Tai i bin tokaut long wanpela nius rilis long asde olsem ol Bod ov Dairekta bilong Tisa Sevings na Lon Sosaiti i amamas long tokim ol memba bilong olsem mani invesmen bilong ol i bin kamapim K13,191,382 long pinis bilong 31 Desemba 2015 na dispela em i soim 14.6 pesen moa i go antap winim intres bilong yia i go pinis.

Em i soim tu olsem i gat 7 pesen sevings intres reit, we i kisim mak antap tru aniniti long Sevings na Lon Sosaiti (Amenmen Ekt) 1995. Ol i kisim dispela intres mani long wanpela risev fan we ol Bod ov Dairekta i bin givim tok orai tlong en long kain wok bilong moa intres bai golong ol memba.

Insait long fainensal yia 2015, K4,696,268.00 i bin go insait long ol sevings akaun bilong ol memba. Dispela em i 16.9

pesen moa winim bilong nara-pela fainensal yia i go pinis. Dispela i bungim olgeta intres i go long ol memba sevings akaun i brukim rekot i go long K17,887,650.

Mista Tai i tok, Sosaiti i kisim pastaim long odit, K9,648,863 insait long wankain fainensal yia we i soim wanpela 25 pesen i go antap long fainensal yia bilong 31 Desemba 2014, we ol i bin kisim K7,672,927.

Dispela mani mak i go antap i soim 14 pesen moa winim K37 milien long 2014 i go long K42 milien long 2015, baksait long wanpela 50 pesen moa intres i kam insait long lon buk. Em i minim olsem dispela propit em i kam insait long ol lon intres bilong ol memba husat i kisim ol lon insait long yia.

Mani mak bilong olgeta aset bungim wantaim em i go antap long 2.8 pesen long K544,838,024 long 2014 i go long K560,304,082 long 2015. Ol dispela namba i soim gutpela propit i kamap tasol bisnis i stap wankain yet.

"Mipela i luksave long sapot

bilong ol memba bilong sosaiti na mipela i amamas long tokaut olsem mipela yet ol liklik Papua Niugini mana na meri i papa long dispela kampani, mipela yet i stap dairekta na menesa long en tu," Mista Tai i tok.

Sif Eksekutiv Opisa (CEO) bilong TISA, Michael Koisen i tok, "No gut yupela i ting olsem dispela em i wanpela bikpela mak tru long brukim rekot we ol i kamapim, nogat.

Mipela i bin kamapim moa propit tu long bipo, tasol em long taim we ikonomi na bisnis i bin ran gut. Mipela i amamas long tokaut long dispela K13 milien propit long 2015 bikos em i kamap long taim we ikonomi i painim taim long sanap strong long kantri."

TISA Sevings nau i gat 16 brens long klostu olgeta hap bilong Papua Niugini. Insait long dispela yia, ol Bod ov Dairekta bai opim tupela moa brens long Wabag na Simbu. Liklik taim bihain bai ol i go long Kerema tu.

Em i visen bilong ol bod long go long olgeta kona bilong Papua Niugini.

## Gavman bai kamapim egrikalsa fan

PRAIM Minista Peter O'Neill i tok invesmen long egrikalsa i no bin kamap gut aninit long pastaim gavman tasol dispela gavman i wok long mekim sampela gutpela samting long kirapim dispela nam-bawan sekta bilong ikonomi bilong dispela kantri.

Mista O'Neill i mekim dispela toktok long 2016 Lidasip Samit asde long Pot Mosbi taim em i laik bekim askim bilong Gavana bilong Wes Nu Briten, Sasindran Muthuvel, husat i askim em sapos gavman i ken mekim sampela gutpela samting long kirapim egrikalsa long PNG.

Mista O'Neill i tok gavman i gat plen long putim sampela bikpela mani long kamapim wanpela egrikalsa fan we ol lokal fama na ol manmeri long egrikalsa sekta i ken kisim dinau mani dispela fan na kirapim SME bisnis long egrikalsa sekta.

Mista O'Neill i tok PNG i gat planti gutpela graun we i no nidim ol marasin bilong planim kaikai tasol no gat bikpela mani long sapotim ol fama na ol liklik long planim ol kaikai na lukautim ol enimal.

Mista O'Neill i tok pastaim gavman i bin givim klostu long K500 milien long sampela ol fama na ol manmeri husat i save planim kaikai na husat i mekim egrikalsa bisnis tasol dispela mani i no karim gutpela kaikai.

"Gavman i bin givim mani long sampela fama long planim kaikai na mekim egrikalsa bisnis. Tasol dispela i no karim gutpela kaikai. Ol i bin kisim bikpela mani tasol no gat wanpela fam i kirap," Mista O'Neill i tok.

Em i tok pastaim Egrikalsa Benk i save givim bikpela mani i go long sapotim ol fama bilong kakao, kopi, kobra, wel pam, na arapela ol egrikalsa kaikai tasol bisnis bilong dispela ol lain i no kamap bikpela nau long dispela taim.

"Egrikalsa benk i save sapotim ol fama bilong yumi long ples. Ol i save kisim gut bikpela mani. Tasol ol i no kirapim bisnis bilong ol. Bisnis i dai," Mista O'Neill i tok.

Gavana Muthuvel i tok gavman i mas sapotim ol pipel long ples wantaim ol trening na skul samting long helpim ol manmeri long luksave gut long samting bilong planim kaikai na mekim liklik fam bisnis.

"Ol pipel i nidim sampela wok manmeri bilong Dipatmen ov Egrikalsa long skulim na sapotim ol manmeri long mekim egrikalsa bisnis. Yumi gat gutpela graun na yumi nid long mekim planti samting long kirapim egrikalsa sekta," Mista Muthuvel i tok.

Mista O'Neill i tok pastaim Egrikalsa Benk i save givim ol dinau mani long ol fama

long kirapim egrikalsa bisnis. Egrikalsa Benk i senisim nem i go long Nesenel Developmen Benk (NDB).

"Pastaim benk i save givim dinau mani. Intres ret i no bikpela. 2, 3 o 4 pesen long 20 o 30 yia em bin intres ret. Tasol ol fama i no yusim dispela sans gut," Mista O'Neill i tok.

Em i tok gavman bai nau lukuk long stretim sampela nupela lo na kirapim sampela nupela polisi long helpim ol mameri long i gat sans long kisim dinau mani na kirapim ol bisnis long egrikalsa sekta.

Deputi Oposisen Lida Sam Basil i bin salensim gavman las wik taim em i singautim gavman long mekim samting stret na maski long bakmaus nating long SME taim tru tru gavman i no mekim wanpela samting long kirapim SME long egrikalsa sekta.

"Gavman i wok long tok-tok long kirapim SME na egrikalsa sekta tasol no gat wanpela samting i kamap. Mi hat long lukim wanpela sampela fama i kisim sapot na helpim long gavman.

"Ol pipel i ken statim bisnis long egrikalsa na groim dispela bisnis i kamap bikpela. Tasol gavman i no helpim ol na sapotim ol wantaim mani na ol samting bilong skulim ol na trenim ol long save long wok egrikalsa," Mista Basil i tok.

## Gavman i no sot long mani

**i kam long fran pes**

"Dispela em i gutpela sain long kain kantri olsem PNG. Sampela kantri i wok long bungum hevi bikos ol i kisim moa dinau mani long groim ikonomi bilong ol."

"Gavman bai menesim gut ol dinau kantri i gat long ol bikpela benk. Ol investa na bisnis manmeri bilong arapela kantri i save olsem ikonomi bilong PNG em i wok long gro. Olsem na planti ol kampani na bisnis manmeri i wok long kam insait long kantri. Ol i bilip strong long ikonomi bilong yumi."

Mista Vele i tok level bilong inflesen i no bikpela tumas.

"Level bilong inflesen em i 6 pesen tasol. Em i no bikpela mak tumas. Em i stap long skel mak we mipela inap long katim i kam daun.

"Plantai taim yumi save toktok long in-

flesen taim, yumi save lukluk long sait bilong ol kastoma na ol manmeri husat i save baim ol kaikai na ol samting.

"Tasol dispela inflesen bai no inap bringim bikpela hevi i kam long ol bisnis na praivet sekta kampani.

"Dispela gavman i mekim moa wok long kirapim ol samting long strongim ikonomi long gro na kirapim planti sans long ol manmeri i ken mekim bisnis na i gat gutpela sindaun."

Mista Vele i tok gavman i helpim ol wan wan provins, distrik na lokal level gavman (LLG) long glasim gut na painimaut ol hevi na nid bilong ol.

"Gavman i givim sans long ol provins, distrik na LLG long lukluk i go insait long ol hevi, wari na nid ol i gat. Gavman i wok long givim mani long ol na helpim ol long stretim ol dispela hevi," em i tok.



# Bando: Sekewa no ken bikmaus nating

**Hela Provinsal Edministreta William Bando i tok i no gat wanpela paul pasin o stil pasin i kamap long mani bilong provinsal gavman o mani bilong ol LNG papagraun.**

Mista Bando i mekim dispela toktok bihain long wanpela man Kopiago, Jacob Sekewa, i tok ol wok man bilong provinsal edministresin i mekim sam-pela paul pilai long kisim wanpela bikpela mani bilong infrastraksa devel-opmen gren (IDG).

Mista Bando i tok dispela K53 milien Hela Provinsal Gavman I bin kisim las yia em i no mani bilong IDG.

“Planti toktok i kamap long strit na sosel midia long K53 milien Hela provinsal gavman i kisim na peim. Mista Sekewa i no ken bikmaus nating.

“Yes, mipela i kisim dispela mani na peim i go long planti samting. Yes, mipela i bihainim toktok bilong ol politik masta bilong Hela na bihainim ol lo na polisi long peim dispela mani i go long kamapim sampela gutpela samting long kirapim provins,” Mista Bando i tok.

Em i tok Hela Provinsal Gavman i bin kisim dispela mani long kirapim ol ki infrastraksa na gavman bilong Hela provins olsem;

- Hela 1, Hela 2 na Hela 3 Provinsal Hetkwata Biding long Tari,
- Komo Lup rot,
- Hulua-Komo rot,
- Homa-Paua-Tari rot,
- Tari-Ambua rot siling projek,
- Nogoli grot senta,
- Baim graun long kamapim dispela grot senta,
- Haus bilong Tari PA,
- Kirapim nupela Tari dsitrik hetkwata long Tipa Andaka,
- Kirapim haus bilong ol wok manmeri bilong Tari kot haus long Jalupa;
- Namba 2 aien bris long wara Tagali long Loka ples Tagali LLG long joinim Mt Kare gol-silva maining projek,
- Mentenens na putim pawa long Hawa haus kalabus,
- Kirapim haus bilong ol pablik sevan long Komo;

- Kirapim haus bilong ol pablik sevan long Koroba;
- Ol arapela rot siling projek;
- Subsidi i go long Enga Provinsal Gavman,
- Koroba taun rot siling projek, na
- Kopiago haiwe rot projek (long larim Sekewa i lusim Pot Mosbi siti lait na draivim kar i go long ples bilong em).

Mista Bando i tok K2 milien bilong edmin i bin go long rausim ol LNG papagraun long PDL 1 na PDL 7 long Hides. Ol dispela papagraun i bin stap long Coots Lodge long Pot Mosbi bihain long ol i bin komplek na lutim petisen i go long gavman.

“Sapla na tendas bod i bin lukluk long dispela olgeta projek. Mipela i bihainim lo long kisim na katim dispela mani i go long ol nambawan projek long kirapim nupela provins.

“Sapos mi no bin yusim Seksen 32 pawa bilong mi aninit long lo na kisim dispela mani, kot oda inap long stopim dispela mani na dispela inap long mekim samting i go hat olgeta na manmeri bilong Hela bai no inap lukim ol dispela gutpela projek.

“Mipela i wok long wok hat tru long kirapim provins. Em i hat stret long mekim wanpela wok long hia. Tasol mipela i wok long isi isi kirapim ol sevis olsem rot, benk na post opis. Hawa haus kalabus i kisim ol mentens wok na joinim pawa na bai redi klsotu taim long kisim ol kalabus manmeri.

“Ol rot projek i kamap long planti ples long Hela. Plis kam long ples na lukim wanem samting mipela i kamapim. Mipela i no stap nating na kaikai mani. Mipela i kirapim provins,” Mista Bando i tok.

Em i tok kot i stopim moa long K214 milien IDG mani bilong yia 2013, 2014 na 2015. Dispela mani em bilong kirapim ol projek long Hela tasol kot i holim i stap yet na ol pipel blong Hela i kisim taim.

“Klostu taim tasol bai mi givim wanpela ripiot long Mista Sekewa na ol poroman bilong em long lukim sapos mipela i yusim mani gut o no gat. Em yet i ken lukim na skelim,” Mista Bando i tok.



Hela Provinsal Edministreta William Bando na Gavana Anderson Agiru.

## Philemon laikim bai ileksen

MILEN Be Gavana, Titus Philemon, i singautim Ilektoral Komisin long ranim bai-ileksen bilong Samarai-Murua Open ilektoret.

Tasol Ilektoral Komisin i no gat mani long ranim dispela bai ileksen bilong Samarai-Murua open ilektoret.

Sia bilong Samarai-Murua open i stap nating bihain long Lidasip Traibunel o kot i painimaut osem memba Gorden Wesley i no bin bihainim lo stret long winim ileksen long yia 2012.

Gavana Philemon i tok Ilektoral Komisin i no bin toksave long Milen Be Provinsal gavman long wanem samting bai kamap long Samara-Murua open bihain long kot i bin mekim desisen long rausim Mista Wesley.

“Lo i tok bai ileksen i mas kamap sapos wanpela sia bilong palamen i stap nating. Long dis-

pela as, ol manmeri bilong Samarai-Murua i gat rait aninit long Mama Lo long larim ol i gat lida husat bai makim maus bilong ol long Nesanel Palamen,” Mista Philemon i tok.

Las wik Sif Ilektoral Komisina, Patilias Gamato, i tok Ilektoral Komisin i sot long ranim long ranim bai-ileksen bilong Samarai-Murua open ilektoret.

Mista Gamato i tok Ilektoral Komisin i skelim olsem em i no gat inap mani long ranim bai ileksen.

“Mani i sot long ranim dispela bai ileksen. Olsem na Ilektoral Komisin i mekim desisen long larim sia bilong Samarai-Murua i stap nating long dispela wan yia na 6 mun.

“Samarai-Murua ileksen bai kamap long 2017 long taim bilong nesanel ileksen wantaim olgeta arapela ilektoret long PNG,” Mista Gamato i tok.

Em i tok taim i sot long ranim

bai-ileksen bilong dispela ilektoret na tu nupela wankor husat i win bai no inap gat moa taim long mekim wok.

“Taim i sot tu. Mask Mama Lo i tok orait long kamapim bai ileksen sapos sia i stap nating tasol mani em i wanpela samting mipela i sot long ranim gen bai ileksen bilong Samarai-Murua. Olsem na bai yumi wetim 2017 nesanel ileksen tasol,” Mista Gamato i tok.

Tasol Gavana Philemon i no wanbel long dispela toktok bilong Mista Gamato. Mista Philemon i tok Ilektoral Komisin inap long raitim wanpela pas na givim long Milne Bay Provinsal gavman.

“Ol inap long raitim wanpela pas na toksave long mipela. Sapos bai ileksen bai no inap kamap, dispela i soim olsem Ilektoral Komisin i no bihainim Mama Lo bilong kantri,” Mista Philemon i tok.

## Benk mas helpim manmeri

TRED, Komes na Industri Minista Richard Maru i tok ol komesal benk long PNG i wok long mekim bikpela winmani tasol ol i no save helpim ol manmeri long PNG long kisim dinau mani na statim liklik bisnis o SME.

Minista Maru i tok ol komesal benk i lukim PNG olsem wan-

pela kantri we ol lo bilong mekim benk bisnis i gutpela tru.

Em i tok dispela i lukim ol komesal benk i sasim bikpela intres mani sapos ol i larim ol manmeri i kisim dinau mani.

“Mak bilong bekim mani wantaim intres em i bikpela tru. Tasol mi laikim gavman i mas kirapim wanpela lo long

larim ol benk i invesim 15 pesen o 20 pesen mani bilong ol long egrikalsa.

“Ol i mas sapotim ol manmeri bilong yumi long kirapim egrikalsa bisnis. Dispela kain sistem i no nupela.

Sri Lanka i gat dispela kain lo na ol benk i save bihainim,” Mista Maru i tok.

are you **Savings fit?**



Give your savings a workout by opening a **PLUS SAVER, TERM DEPOSIT** or **KIDS SAVINGS ACCOUNT** today.

**Weekly Smartphone Giveaway:**

Simply open a new **BSP Plus Saver, Term Deposit** or **Kids Savings Account** before 31<sup>st</sup> March, 2016.



www.bsp.com.pg   

# Riviu bilong dispela wik...

## Tato kisim bek wok

Suprim kot i givim oda pinis olsem Solomon Tati em i Edministreta bilong Isten Hailans na em i ken mekim dispela wok. Kot i tok tu olsem Samson Akunai i no moa ekting edministreta. Sif Justis Salamo Injia i bin givim dispela oda bilong Suprim Kot we i stopim ol arapela kot salens i bin kamap long rausim Mista Tato long holim wok bilong Edministreta bilong Isten Hailans.

## UPNG i kisim Gems Viles

GAVMAN i givim ol haus slip long Gems Viles i go long Yunivesiti bilong Papua Niugini (UPNG) long Tunde long dispela wik. Nesenel gavman i bin sanapim ol dispela haus slip insait long UPNG we ol spotmanmeri bilong Pasifik Gems i bin yusim las yia. Praim Minista Peter O'Neill i bin promis long givim Gems Viles i go long UPNG tasol ol i stretim tok wantaim PNG Spot Federesen na nau UPNG bai papa long 8-pela blok dispela ol dispela naispela haus slip. Vais sansela bilong UPNG, Profesa Albert Mellam i tokim ol studen olsem i tambu tru long kaikai buai na dring spak insait long dispela hap. Em i givim strongpela tok lukaut olsem sapos ol studen i no harim tok bai ol i raus long dispela haus slip.

## PNG strongim wok bung wantaim India

PRAIM Minista Peter O'Neill i bungim wanpela bisnis delegesen bilong India long dispela wik. Ol i kam lukluk raun long PNG long strongim wok bisnis namel long PNG na India. Ol dispela bisnis lain i kam lukluk long ol kain samting olsem helt kea, tekstail, neturel ges, egrikalsa, edukesen na maining. Praim Minista i tok bisnis namel long PNG na India i liklik yet na i gat sans long gro moa. Dispela lukluk raun bilong ol i kamap long dispela yia we Presiden bilong India Pranab Mukherjee bai kam lukluk raun long PNG.

## Graun bruk na kilim tripela

WANPELA mama i gat 24 krismas na bebi bilong em wantaim wanpela liklik pikinini meri husat i gat 8-pela krismas i bin dai long taim graun i bruk long hap bilong Gulogonil long Simbu. Ples we dispela birua i kamap, i stap antap long maunten long Kamtai eria long Sinasina-Yongomugul distrik. Dispela birua i bin kamap long las wik Fraide long taim ol i slip. Graun i bruk na karim haus i go daun wantaim na karamapim ol. Ol arapela manmeri husat i harim nois i bin ranawe nabaut long nait. Ol i painim bodi bilong ol tripela long Sande moning.

## Miria Ikupu i siaman bilong Motu-Koita

SIAMAN bilong Motu-Koita Asembli, Miria Ikupu i winim kot long stopim ekting siaman Opao Udia long holim dispela wok. Mista Ikupu i bin go long kot bihain long Mista Udia na ol sapota bilong em i rausim em long wok bilong siaman long taim em i sik na stap long Australia. Mista Ikupu i tokim kot olsem i kisim sik liv long Jun 2015 na go kisim medikol tritmen long Australia. Em i bin askim Mista Udia long lukautim opis olsem ekting siaman. Tasol long taim em i kam bek long Novemba 2015, Mista Udia na ol sapota bilong em i no larim em i kisim bek wok bilong siaman, na ol i rausim em.

## Ol saintis painim nupela trausel


Ol risets saintis i painim wanpela nupela kain trausel long PNG. Dispela trausel bilong kolwara i wankain olsem sait-nek trausel i save stap long Saut Amerika na Australia, na Timor na Roti. Ol i painim dispela trausel long wanpela wok painimaut em ExxonMobil PNG (EMPNG), opereta bilong PNG LNG projek, i bin givim mani i go long Yunivesiti bilong Canberra, Australia long mekim. EMPNG i givim mani long sapotim ol wok bilong lukautim Piku, dispela pik nus trausel i save long hap bilong Galp provins.

## Lupari tok amamas long gavman

SIF SEKETERI bilong gavman, Isaac Lupari i tok nesanel gavman i mekim planti bikpela mak insait long dispela tripela yia. Sampela bilong ol dispela bikpela samting bai ol i soim long bung bilong ol ol lida ol i kolim Lidasip Samit em i stat long Mosbi long Trinde Febueri 17. Em i tok i gat planti samting i wok long kamap nau long olgeta hap bilong kantri. Gavman i wok long kamapim ol kain samting olsem ol rot, helt senta, na ol klasrum na ol dispela samting i soim ples klia olsem gavman i wok long bringim sevis i go long ol pipel.

## Tait i bagarapim Hailans Haiwe

TAIT wara i brukim Bena bris long Isten Hailans na Hailans Haiwe i pas inap ol i ensinia bilong Woks Dipatmen i painim narapela rot bilong ol kar. Seketeri bilong Woks, David Werek i tok save olsem rot bai pas sotpela taim bikos tait i brukim dispela bikpela bris long Bena. Em i laik ol pablik i mas save olsem rot i pas na ol wokman i wok nau long stretim. Mista Werek i tokim ol asples tu long soim rispek long ol dispela wokman na larim ol i mekim wok bilong ol long stretim gen bris i painim narapela rot ol kar i ken yusim.



**PABLIK TOKSAVE  
INTENEL REVENIU KOMISEN**

**BIKPELA TOKSAVE I GO LONG OL LAIN BILONG BAIM  
TAKIS NA OL ATORITI HUSAT I SAVE MEKIM PEIMEN**

**SETIFIKET OV KOMPLAIENS**

Wantaim wok bilong nupela IRC kompiuta sistem "SIGTAS", IRC em i wok long givim aut wanpela isi we bilong givimaut ol Setifiket ov Komplaiens (CoCs). Nau ol setifiket i gat nupela lukluk, we wan wan bilong ol i gat Tekspeia Aidentifikesen Namba (TIN) na wanpela setifiket namba.

**Sapos yu stap long Pot Mosbi na aplai:**

- Kam long graun plua bilong Era Rumana haus (blupela haus i sanap long sait bilong Revenu Haus), na go long namba wan kastoma sevis kaunta. Givim wanpela CoC aplikesen fom o wanpela kopi bilong TIN Setifiket bilong yu long statim wok bilong kisim wanpela CoC. Taim bilong wok em stat long 8:30 moning taim i go long 3:00 klok long apinun olgeta de bilong wok.
- IRC Opisa bai sekim rejistresen bilong yu, na lukim sapos ol aplikesen bilong yu na peimen bilong yu i stat stret long bisnis bilong yu pastaim long em bai givim yu wanpela CoC. Wanpela CoC em i gat deit bilong pinis em ol i makim antap long en na em bai stap orait yet inap long yu kisim dispela deit.
- Nupela setifiket bai gat wanpela kain siri namba bilong en yet na ol bai putim stem na IRC opisa husat i givim aut dispela setifiket bai sainim. Ol lain bilong baim takis bai kisim wanpela kopi tasol bilong CoC long IRC tasol ol i ken wokim kopi bilong ol i go long ol lain i gat dinau na ol lain i baim samting long ol.
- Setifiket ov Komplaiens em ol i givim fri, na em i save hariap (inap long givim planti tu). Sapos wanpela opisa i askim yu long baim CoC bilong yu, hariap yu mas givim ripot long telepon namba 321 0041 o e-meil long anticorruption-hotline@irc.gov.pg

**Sapos yu wanpela nupela bisnis stret:**

- Namba wan samting yu mekim em yu mas aplai long wanpela TIN na long wokim dispela yu mas pulimapim wanpela TIN fom na givim i go long IRC opis long wanem hap bilong kantri yu stap long en. Olgeta IRC fom i stap long websait adres www.irc.gov.pg na em i fri long kisim. Taim yu kisim TIN bilong yu pinis, yu nau ken aplai long kisim CoC bilong yu.
- Yu ken skenim na salim TIN1 fom bilong yu long e-meil (na ol arapela pepa bilong sapotim) i go long IRC long dispela adres; registrations@irc.gov.pg

**Sapos yu gat wanpela olpela rejistresen namba (TFN) na yu no kisim yet wanpela TIN:**

- Toksave long IRC Opisa long kaunta na ol bai helpim yu long senisim akaun bilong yu long TFN i go long wanpela TIN.

**Sapos yu aplai long narapela hap ausait long Pot Mosbi:**

- Kisim wanpela kopi bilong CoC aplikesen fom long IRC web pes long www.irc.gov.pg o kisim wanpela kopi long lokal IRC Opis bilong yu. Olgeta IRC fom em i no gat fi long ol.
- Pulimpaim CoC aplikesen fom, putim TIN bilong yu long antap long raitan kona bilong fom na go putim long wanpela IRC opis i stap klostu long yu. Ol bai salim aplikesen i go long Pot Mosbi long prosesim na bai yu kisim CoC bilong yu long post opis.
- Yu ken kisim CoC bilong yu long opis bilong IRC long taim bilong yu yet. Yu mas givim inap taim long salim fom i kam long Pot Mosbi na long kisim CoC bek gen.
- Yu ken mekim samting hariap sapos yu skenim CoC Aplikesen fom bilong yu na salim long e-meil i go long ComplianceCertificate@irc.gov.pg. na ol bai salim setifiket bilong yu long e-meil i go bek long yu.

**Ol bikpela toksave bilong Setifiket ov Komplaiens:**

- IRC i rausim sampela indastri i no longtaim i go pinis long i bai no inap long givim wanpela CoC moa. Olsem na nau i gat 5-pela indastri tasol i gat wok long ol i mas kisim wanpela CoC. Ol dispela indastri em:
  - Bilding na Konstraksen – olsem ol lain i stretim ol haus, penim, putim ol kabot na tebol samting insait long haus na ol arapela wok bilong wokim haus na konstraksen wok;
  - Rot Transpot long karim ol samting bilong kaikai na ol matiriel
  - Stretim na Mentenens bilong ol moto kar o pat bilong moto kar, olsem penim, stretim bagarap long bodi, na moa;
  - Konstraksen bilong ol wok bilong joineri we i kamap hap bilong ol haus;
  - Wok bilong Sekyuriti Sevis;
- Sapos namba wan wok bilong yu em i no stap long wanpela bilong ol dispela indastri antap orait, yu bai i no inap long kisim wanpela CoC. Tasol, sapos wanpela man i gat dinau/ o man i baim ol samting long yu i askim long wanpela CoC yu mas soim em wanpela kopi bilong dispela notis o toksave, we i tok klia long ol wanem kain indastri em bai ol i givim CoC. Dispela toksave i stap long web sait bilong IRC long www.irc.gov.pg. IRC i no save givim aut eksemens pas long ol bisnis i stap ausait long ol 6-pela indastri i stap antap.
- Sapos CoC aplikesen bilong yu i no orait, yu bai kisim takis akaun stetmen bilong yu long soim olgeta takis bilong yu we yu no bin baim yet na ol dispela we yu bin baim pinis. Yu bai mas baim olgeta peimen we yu no bin baim yet, i go long IRC na putim olgeta fom i go insait, pastaim long ol bai givim yu wanpela Setifiket ov Komplaiens.
- Olgeta Setifiket ov Komplaiens bai stap laip yet inap long taim deit bilong pinis we i stap antap long setifiket i kamap. Yu no ken kisim wanpela nupela CoC inap long olpela i kisim deit bilong en long pinis. IRC i ken rausim wanpela Setifiket ov Komplaiens sapos wanpela lain bilong baim takis i stop long bihainim ol lo bilong CoC.

**Bikpela Toksave:**

Wok bilong Setifiket ov Komplaiens em long givim tok orait long ol i no ken rausim Bisnis Peimen Takis long ol samting ol narapela lain i baim long bisnis insait long 5-pela indastri we nem bilong ol i stap antap. Em i no inap long mekim senis long ol narapela rot bilong holim takis olsem ol seleri o pei bilong wokman na meri (SWT), Guds na Sevis Takis (GST), na moa... I no gat wanpela lain i gat atoriti long skim yu long givim wanpela Setifiket ov Komplaiens long NARAPELA as moa long yu yu long soim olsem yu inap long baim Bisnis Takis.

Em i wanpela nupela lo i kamap olsem sapos yu laik opim wanpela bisnis benk akaun, yu mas givim wanpela kopi bilong TIN setifiket bilong yu long benk. Dispela lo i NO karamapim wanpela Setifiket ov Komplaiens. Sapos wanpela benk i askim yu long soim wanpela Setifiket bilong Komplaiens long opim wanpela akaun, yu soim ol wanpela kopi bilong dispela tok save we i tok olsem yu no nidim wanpela Setifiket ov Komplaiens long opim wanpela benk akaun wantaim TIN setifiket bilong yu.

**Sapos yu laik save moa:**

- Sapos yu gat sampela moa askim long wok bilong kisim CoC, yu ken kisim long IRC:
  - long telepon namba 322 7210 o 322 6843; o
  - long e-meil ComplianceCertificate@irc.gov.pg; o
  - go long wanpela IRC opis klostu long yu.

Tok orait bilong dispela toksave i kam long Betty Palaso – Komisina Jeneral

**Ol taim bilong baim: 8:30 moning taim i go long 3:00 klok apinun. Mande i go long Fraide.**  
**Yu mas raitim ol sek i go long "COMMISSIONER GENERAL INTERNAL REVENUE" NA MAKIM "NOT NEGOTIABLE".**  
**YU KEN WOKIM PEIMEN LONG BENK BILONG YU YET NA YU NO INAP I GO LONG IRC OPIS LONG MEKIM.**  
**LONG SAVE MOA LUKIM www.irc.gov.pg YU KEN MEKIM PEIMEN LONG EFTPOS MASIN TU.**  
**OL TAKIS FOM NA GAID TOKTOK I STAP LONG IRC WEB SAIT www.irc.gov.pg WE YU INAP LONG KISIM.**  
**PLANTI PIPEL I SAVE BAIM TAKIS BILONG OL LONG TAIM STRET**

# Risets woksop i kamap long Pot Mosbi

PAPUA Niugini Forest Atoriiti na Australia Senta bilong Asples Egrikalsa Risets (ACIAR) i holim wanpela woksop long Pot Mosbi longTunde dispela wik.

Dispela woksop, ACIAR-PNG Forestri Risets woksop 2016 em i bihainim narapela tupela we tupela ogenaisesen i bin holim long las tupela yia i go pinis. Long 2014 woksop ol i bin holim i bin lukluk long ol risets projek na long 2015 ol i bin toktok long ol polisi.

Ol dispela woksop i kamapim gutpela wok wantaim ol stekholda long bringim ACIAR forestri program long PNG. Insait long 2016 woksop ol bai bihainim dispela rot na long kamapim wanpela wei bilong kamapim gen ol forestri plen na ol bikpela tingting bilong ACIAR long PNG.

Woksop i bin plen long kamapim ol bikpela toktok olsem: PNG forestri na ol wankain samting long egrikalsa risets prairiti na program; Moa toktok long ol nupela rot ol i kamapim long ACIAR FST projek; ol ki polisi

isu i wok long kamap long ol risets projek na long ACIAR forestri prairiti long PNG.

Eking Menesing Dairekta bilong Nesanel Fores Sevis, Goodwill Amos i wokim tok welkam na bihain Tony Bartlett, ACIAR Program Menesa i toktok long ACIAR Forestri Program long PNG. Dairekta bilong Fores Polisi na Plening Dokta Ruth Turia na NFS Menesa bilong Polisi na Eid Kodinesen, Dambis Kaip tu i givim ol toktok long wanem ol wok kamap na hevi i stap long ol polisi bihain long 2015 woksop.

Fores Risets Institiut long Lae tu i toktok long bilong ol wok i stap yet long wokim risets program na tu long ol NARI risets program we dairekta, Dokta Segie Bang i givim.

Long pinis bilong woksop, ACIAR Risets Program Menesa i givim Komonwelt Forestri Awod i go long pastaim menesing dairekta bilong Nesanel Fores Sevis, Kanawi Pouru.

# Nupela help des sevis bilong kisim NID kat

**WANPELA PNG NID Help Des na ples bilong kisim ol NID Kat na setifiket bilong mama karim de nau i kamap pinis long Pot Mosbi.**

Dipatmen bilong Nesanel Plening na Monitaring na Papua Niugini Sivel na Aidentiti Rejistri aninit long wok bilong PNG Nesanel Aidentiti projek i opim nupela PNG NID Helpim Des na ples bilong kisim tok save bilong ol kat.

Dispela help des sevis em ol opisa bai yusim fon long salim SMS long ol lain husat kat bilong ol i redi pinis long kisim.

Minista bilong Nesanel Plening na Monitaring, Charles Abel i bin tokaut long dispela wik olsem dispela sevis nau i stap we ol pipel bai i no ken wet nating, tasol ol bai inap long harim wanem samting i kamap long eplikesen bilong ol.

“Mipela i save long hevi bilong ol pipel i wet longpela taim long kism ol NID kat bilong ol. Mipela tingting long ol lain husat i bisi long wok na i no gat taim long go long Sivel Rejistri long kisim ol kat bilong ol. Long dispela as mipela amamas long tok save olsem dispela help des em bai kamap hap bilong kisim olgeta kain tok save,” Mista Abel i tok.

Em i tok, PNG NID Helpim Des em i stap long bikpela plen bilong mipela long givim kwaliti klaien sevis we PNG NID Projek Menesmen i wok long sapatim wantaim PNG Sivel na Aidentiti Rejistri. Em bai daunim sampela hevi bilong ol pipel husat i nidim sevis na i no kisim gutpela sevis i kam long opis bilong NID.



Minista bilong Nesanel Plening na Monitaring, Charles Abel. Poto: Wantok

Dispela bai stopim pasin bilong baim ol wokman long mekim ol wok bilong NID kat na bon de setifiket long ol lain husait i no save long wok bilong dispela.

“Mipela askim ol pablik long yusim dispela Helpim Des olsem gutpela wei bilong stretim wok namel long opis wantaim ol klaien.

Mipela i lukim olsem nau yet i gat hap namba bilong ol dispela kat we ol i prinin pinis na i stap bilong ol lain i kisim long ol Sivel na Aidentiti Rejistri opis long kantri. Mipela i laik mekim isi long ol klaien bai inap kisim ol kat bilong ol.

Wantaim dispela PNG NID Kat Koleksen Toksave sevis, mipela traim long stretim wei bilong wok long mak we ol klaien bilong mipela bai kisim sevis gut na ol bai kisim ol NID kat bilong ol long taim stret.

Lukluk bilong PNG NID Kat

Koleksen Toksave Sevis em i wanpela SMS tok save we bai gat; PNG NID Bena (na i no telepon namba), ful nem bilong klaien, NID namba na ples bilong go kisim kat. Dispela em i olsem risit bilongklaien we em bai soim long ples bilong em i kisim kat.

Em i namba wan taim long wanpela gavman dipatmen i givim kain sevis we ol pablik inap long kisim stret tok save na sevis. Dipatmen bilong Nesanel Plening na Monitaring wantaim PNG Sivel na Aidentiti Rejistri aninit long lidasip bilong Ministri bilong Nesanel Plening na Monitaring i amamas long kisim dispela kain nupela wei bilong bringim sevis long ol pipel.

Wantaim dispela mipela strongim gen tingting bilong mipela long givim gutpela sevis bilong rejistresen long ol sitisen bilong mipela,” Mista Abel i tok.

# NCD Polis i holim pasim Saina man

POLIS long Nesanel Kapital Distik i holim pasim Saina man, Zhou Qianbin, gen long em i bin ranawe long kot namba wan taim ol i bin holim na sasim em long bihain i bin kisim moa long milien kina i go long Esia.


Komanda bilong Boroko Polis Stesen na Sif Inspekta, Brian Kombe, i lukim dispela dispela man na kisim em i go long Boroko Polis Stesen long las wik Trinde.

Komanda bilong Nesanel Kapital Distrik na Asisten Komisina, Sylvester Kalaut, i tok, olupela bos bilong Qianbin i kotim em long sampela paul pasin i bin kamap. Em i askim ol man i gat pawa long gavman long rausim Qianbin long PNG.

Em i tok, “Qianbin na meri bilong em, Ge Jiao Jiao, i bin salim moa long milien kina bilong bos bilong ol i go long Saina.

Ol opisa bilong kampani i lukim na ol i ripot long NCD Polis, tasol stori i kamap tupela gen na sampela polis opisa i laik holim pasim opisa bilong kampani long em i bin pretim

Zhou Qianbin



meri bilong Qianbin.

Sampela polis opisa i helpim tupela marit na rausim ol samting bilong ol long eria bilong kampani long Mosbi na Ge Jiao Jiao i lusim long kantri long Febuari 4.

Wanpela opisa long lmi-gresen dipatment i tokim Polis Midia Yunit olsem balus bilong Ge Jiao Jiao i bin redi

long flai long 10.05 am.

Tasol ol i bin holim Qianbin na sasim em na bihain em i bin baim K5000 na i kam ausait. Tasol em i no go long kot na hait insait long sampela de.

Mausman bilong kampani i tok disisen bilong rausim Qianbin long kantri em ol i kisim pinis bihain long ol i rausim em long wok.

# Traibel pait i bikpela

## ...kamapim nupela polis yunit

OPOSISEN Lida Don Polye i toktok long ol i ken kamapim wanpela nupela Polis Yunit bilong stopim pait i kamap namel long ol wanpisin long Hailans rijon.

Mista Polye i askim dispela taim em i lukim olsem

Royal Konstabuleri i plen long kamapim nupela polis yunit bilong turis.

Em i gutpela long Polis Komisina Gary Baki i toktok long ol spesel nid we polis i gat.

Tasol, Polye i salensim

em long kamapim moa polis sevis long ol narapela eria i gat nid long en.

“Komisina mas lukluk long kamapim ol para-militiri insait long polis fos long stopim traibel pait o pait i kamap insait long siti.

“Para-militiri opisa i mas trening olsem polis na militiri wantaim,” Polye i tok.

Em i tok moa olsem ol dispela para-militiri i mas gat ol spesel ikwipmen bilong stopim pait. Ol i mas skruim manpawa i go

antap moa long 100 opisa long wan wan distrik em wanpela nupela samting ol i mas lukluk long en.

Traibel pait i save stopim developmen, laip i save lus na planti propeti inap long planti milien kina i save lus.

# BPNG bai no inap giaman

OPOSISEN Lida Don Polye i tok Bank of PNG (Sentral Benk) i no save giamanim ol manmeri.

Mista Polye i mekim dis-

pela toktok bihain long Tresera Patrick Pruaitch i tok Gavana bilong Sentral Benk, Loi Bakani, i no bin mekim stretpela toktok

long sait bilong ikononi bilong PNG.

Mista Bakani i bin tok ikononi bilong kantri i no stap gut. Em i tok BPNG i luksave olsem PNG i sot long foren risev na dispela i mekim ol kampani na bisnis haus i kisim hat taim long baim ol samting long ovasis.

Tasol Tresera Pruaitch i bin tok ikononi bilong kantri i ran gut. Em i bin tok gavman wok long lukautim gut mani bilong PNG.

Mista Polye i tok Mista Pruaitch i wok long giamanim pipel bilong dispela kantri.



# OTML sapotim manmeri Westen



Ol bot i kisim ol bek rais long Aiambak long skelim long ol ples insait long Midel Flai distrik.

**MASKI Tedi Maining Limited (OTML) i pas, lewa na tingting bilong kampani i stap yet wantaim ol pipel bilong Westen Provins husat i wok long kisim bikpela taim bihain long ples i bin bungim bikpela birua bilong hot san na drai weda.**

Dispela hot san na drai weda i bin sotim olgeta gaden kaikai. Na tu level bilong Flai Riva i bin go daun na dispela i bin mekim hat long ol sip i karim kaikai na ol arapela ol saplai bilong Ok Tedi Maining.

Maski OTML i saspendingim ol opresen long mun Ogas las yia, dispela i no stopim helpim na sapot OTML i save givim long ol pipel bilong Westen Provins taim ol i bungim hevi.

OTML i wok long givim kaikai saplai long ol manmeri husat i kisim taim bikos kaikai saplia i sot na gaden kaikai tu i sot.

OTML i givim dispela sapot aninit long Ok Tedi Di-velopmen Faundesen (OTDF) bikos OTDF i bin wok bung wantaim Westen Provins Disasta Komiti (WPDC) taim ol i bung long

mun Ogas las yia taim wara level bilong Flai Riva i go daun na kaikai i bin sot.

Long mun Oktoba las yia WPDC i kisim ol ripot na dispela ripot i soim olsem moa long 170, 000 manmeri i kisim bikpela bagarap na ol i nidim moa long K15 milien long baim ol kaikai na mekim laip i go isi.

OTML na Heduru Trust i sori taim tupela i lukim dispela ripot na givim K10 milien long baim 1,600 tan bek rais long Pot Mosbi na givim i go long WPDC long givim long ol pipel.

OTML i givim K5 milien na Heduru Trust i givim nara-pela K5 milien.

Wantaim helpim i kam long OTDF, WPDC i skelim ol kaikai na arapela samting we manmeri i nidim long ol wan wan LLG wot.

Ol i bin wokbung wantaim OTDF, Dipatmen ov Foren Afes bilong Australia, na Yunaitet Nesens na wanbel long skelim ol dispela kaikai long ol wan wan kaunsil wot long Midel Flai na Not Flai distrik.

Long mun Janueri 2016 OTDF i bin toktok na stretim

ol samting wantaim ol dona ejensi na ol kampani i stap long Westen Provins na long Pot Mosbi long bungim mani na baim ol kaikai bilong manmeri husat i bin bungim hevi.

Bihainim dispela, OTML i bin stat long salim ol kaikai long kontena sip i go long Aiambak long givim ol kaikai long ol manmeri Midel Flai na Kiunga long givim long ol manmeri long Not Flai distrik.

Steamships na Consort siping kampani i wanbel long karim 20 kontena bilong bek rais i go long Daru long givim long ol manmeri Saut Flai long mun Febueri dispela yia.

Ol opisa bilong Provinsal Administresen, PNG Difens Fos, OTDF, Starwest na ol lokal komyuniti i wokbung long skelim moa long 115 tan bek rais long ol wan wan ples insait long Midel Flai na Lake Murray.

OTML i tok tenkyu long Trukai Industries long saplim ol bek rais long diskaun prais na Horizon Oil long givim ol kontena long putim ol dispela bek rais long Kiunga.

# O'Neill bungim ol bisnisman bilong India



Praim Minista O'Neill i sekan wantaim sampela ol bisnis manmeri i kam long CII bilong India.

PRAIM Minista Peter O'Neill i tok welkam long wanpela grup bilong ol bisnis manmeri i kam long India.

Dispela grup manmeri i makim maus bilong Konfed-eresen ov Indian Indastris (CII) long India na i kam raun long dispela namba wan taim long painim, sekim na skelim ol sans bilong mekim bisnis na apim level bilong poroman namel long PNG na India.

CII em i bikpela bisnis oge-nasesen bilong India na em i gat moa long 8,000 memba husat i bisnis manmeri long praivet na pablik sekta, we ol SME na ol bikpela kampani tu i stap aninit long em.

Praim Minista O'Neill i bin tokim dispela grup long kam lukluk raun long PNG na painim ol sans long mekim bisnis long heltke, turisim, petroleum, ges, hendikraft, tekstail, egrikalsa, edukesen, infrastraksa, maining na mineral risos.

"Nau em i taim long inves long Papua Niugini," Mista O'Neill i tok.

"Ol samting bilong ikonomi bilong PNG i stap strong,

maski globel ikonomi i no stap gut.

"Dispela raun bilong CII i soim olsem ol intenesenel komyuniti i gat strongpela bilip long ikonomi bilong yumi.

"Mipela i tok welkam long invesmen na bisnis bilong India na dispela bai kamapim moa wok na divelopmen long PNG.

"Dispela raun bilong ol memba bilong CII em i gutpela tru bikos PNG i wet tasol long bungim Presiden bilong India, Pranab Mukherjee, husat bai kam lukluk raun long PNG long dispela yia.

Mista O'Neill i tok tred namel long tupela kantri i no bikpela nau tasol i wok long gro go antap na i luk olsem long bihain taim em bai go antap.

"Tupela kantri bilong yumi i ken yusim ol sans na ol arapela gutpela samting long kirapim tred na invesmen long tupela kantri bilong yumi.

"PNG i ken mekim bisnis wantaim India bikos mipela i gat ol risos na India i gat maket we mipela i ken salim ol samting isi tru.

"Poroman namel long India na PNG long tred na invesmen i wok long kirap hariap taim PNG i opim Hai Komisin long New Delhi, India long yia 2006," Mista O'Neill i tok.

India na PNG i wok long lukim planti gutpela samting i kamap namel long tupela kantri na poroman bilong tupela i wok long kamap gutpela stat long 1976 taim tupela i kamap poroman.

Tupela kantri wantaim i save wokbung long ol arapela bikpela intenesenel bung olsem Forum bilong India Pacific Islands Co-operation (FIPIC), we India i painim ol sans na rot bilong kirapim tred na invesmen wantaim ol Pasifik Ailan kantri.

Praim Minista O'Neill i bin go long miting bilong India Pasifik Ailans Ko-opresen Forum long India las yia.

Bosmeri bilong Pasifik Intenesenel Ko-opresen, Suhba Ranjab, i bin kisim dispela CII delegesen i kam long PNG na ol i bungim Praim Minista O'Neill 15 Febuari 2016.

# MiBenk strong long sevim mani

**Mathew Yakai i raitim**

OL PIPEL bilong PNG i mas strongim tingting na strongim pasin bilong sevim mani na redim ol yet long banisim wanem birua o hevi bai kamap bihain. Ol i noken westim o tromoi mani bilong ol nating nating long baim kain kain samting.

Wanpela benk opisa wantaim MiBenk long Madang, Vero Kolongo i mekim dispela strongpela toktok na salens long ol pipel bilong Uria viles long wod 19 bilong Usino LLG long Madang.

Mis Kolongo i tok planti pipel tude i gat dispela pasin long yusim mani nating nating na no save sevim. Dispela pasin i mas stop. Ol

pipel mas strongim ol yet na stat sevim mani bilong ol long benk na lukim mani bilong ol i gro na i ken helpim ol bihain.

Dispela benk opisa i bin go long ples Uria long mekim aweanes na tu givim taim long ol local fama i opim benk akaunt bilong ol long rurel eria.

Mis Kolongo i tok Mibenk i nogat kain kain ol kondisen o tambu tumas bikos ol i laik lukim moa rurel fama na ol manmeri long ples i gat sans long go insait long ol prodak bilong ol na sevim mani.

"Mipela i gat tripela kain sevangs akaun, MiPikinini bilong ol pikinini na MiSeving na MiCash bilong ol bikpela lain," Ms Kolongo i tok.

Em i tok MiPikinini akaun em i bilong ol pikinini na ol i ken stat opim akaun wantaim K2 na sevim mani i go inap bihain long 18 krismas nau na pikinini i ken witdro o rausim mani bilong ol.

MiCash em mobail benking sevis we yu ken opim akaun wantaim K25 na long MiSavor em yu ken opim akaun wantaim K20. Ol dispela prodak i ken opim dua bilong ol kastoma long kisim dinau mani long benk.

Total mak olsem 55 pesenel akaun em ol rurel fama i bin opim long Februari 6 taim Mis Kolongo i bin go wokim awenes bilong em long Uria viles. Insait long dispela namba i lukim 18-pela pikinini i opim MiPikinini akau



na 37 i opim MiSavor akaun.

Presiden bilong Usino LLG, Joseph Kumun i tok tenkyu long MiBenk long go long rural eria long helpim ol pipel long opim akaun long ples bilong ol. Dispela bai i ken helpim ol manmeri bilong ples long sevim mani.

Sastenebel egrikalsa supavaisa bilong Ramu NiCo

**Ms.Kolongo (sindaun long blu snot) wantaim ol fama long Uria Village, Ward 19, Usino LLG husat i opim nupela benk akaun. Poto: Mathew Yakai**

Menesmen (MCC) Limited, Allan Wahwah i tok ol i amamas tru long wok bung wantaim ol fainensel institusen olsem MiBenk long bringim benking sevis i go long ol rurel eria we Ramu Projek i

karamapim long sevim ol liklik manmeri.

Mis Kolongo i tok ol i amamas long go aut long ol rurel viles long Madang na redi tasol long kisim askim o invitesen.



# Strongim lidasip na save bilong ol vota

**Poto na stori i kam long Australia Hai Komisin**

AUSTRALIA i sapotim tupela nupela projek long Atonomas Rijon bilong Bogenvil long kisim save bilong lidasip na long mekim ol meri i save moa long we i bilong vot.

Australia Ambaseda bilong ol Meri na ol Yangpela Gel, Natasha Stott Despoja, las wik i opim wanpela Yangpela Meri Lidasip na Vota Awenes na Lidasip Edukesen projek taim em i go lukluk raun long Bogenvil.

Mani bilong dispela projek i kam long Australia eid program long mani mak bilong K2.8 milien na dispela Yangpela Meri Lidasip Projek bai sapotim ol meri long kamapim gut ol save bilong ol long wok lida. Na tu long ol i gat strong long toktok moa insait long lokal na rijonal gavman bilong ol na long kamapim ol polisi.

Embeseda Stott - Despoja i tok inap long 90 yangpela meri bai kisim skul long 30 fasiliteta insait long tripela yia. "Ol bai gat sans long bung

wantaim Bogenvil Wimen Federesen na wok wantaim long kamapim sastenebol na inklusim ogenaesen bilong ol meri insait long Bogenvil," Ambaseda Stott - Despoja i tok.

K1 milen Vota Awenes na Lidasip Ekukesen projek bai helpim ol man na meri long wok bung wantaim na save gut long demokretik wei bilong ranim ol ileksen.

Embeseda Stott - Despoja i tok Australia i amamas long em inap long sapotim dispela awenes projek long kamapim wanpela fri, stret-pela na gutpela ileksen wantaim bel isi pasin.

"Dispela projek bai tok klia long mak bilong ol meri kenidet na long strongim tingting bilong ol man long rispekim ol meri bilong ol na ol patna bilong ol long makim husat ol yet i laik makim," Ambaseda Stott - Despoja i tok.

Australia i wok patna wantaim Bogenvil Wimen Federesen long tupela projek wantaim na Intenesenel Wimen Developmen Ejensi long lidasip projek.

Australia i save sapotim jenda ikwaliti long Atonomas Bogenvil Gavman insait long wanpela jenda investmen plen (2014-19) we tupela gavman i bin wok bung wantaim long kamapim long mani mak bilong AUD\$14 milien.

Dispela plen i lukluk moa long tripela eria: long daunim jenda-bes vailens na long sapotim ol sevis bilong helpim ol lain meri na man husat i kamaut long dispela kain hevi; na strongim ol meri lida na long mekim senis insait long ol disisen ol i mekim; na long kamapim ol gutpela rot bilong ol meri long kamapim ol gutpela wok ikononi bilong ol.

Australia i wok long givim moa helpim i go long Bogenvil wantaim gutpela wanbel bilong PNG Gavman na Atonomas Bogenvil Gavman (ABG), bilong sapotim wok bilong Bogenvil i sanap strong long em yet na long bringim ol sevis na strongim gro bilong sosel na ikononi na long strongim ol meri na yut.



Ambaseda Despoja i kisim welkam singsing long taim em i kamap long Buka ples balus.



Minista bilong Komyuniti Developmen Josephine Getsi na Ambaseda Stot - Despoja i katim ribon long opim nupela BWF opis.



Ambaseda Stot - Despoja na Presiden bilong BWF, Rose Pihei.



(L-R) Ambaseda Stot - Despoja wantaim Minista bilong Komyuniti Developmen, Josephine



Hai Komisena David Bloch (L) na Ambaseda Stott Despoja wokabaut long Buka Maket i go long BWF Opis.



# Kalaut bai go pas long ol iviksen oda long NCD

KOMANDA bilong Polis long Nesanel Kapital Distrik na Asisten Komisina, Sylvester Kalaut, i givim aut wanpela oda olsem ol lain husat i laikim helpim bilong polis long mekim ol iviksen wok o rausim ol manmeri long ples ol i save stap long en i ken go long opis bilong Klaut tasol.

Klaut i tok, ol sampela memba bilong konstabuleri husat i no bihainim ol oda na mekim ol iviksen wok insait long NCD em ol bai lainim em gut.

Komanda Kalaut i mekim dispela long taim bihain long planti asua i kamap.

Em i tok, "Ol pipel i yusim polis wantaim i no gat stretpela kot pepa na ol i mekim ol iviksen wok nating. Dispela kain wok krangi i kamap na planti ol famili i stap long strit nau. Dispela em i no gutpela pasin."

"Olgeta askim bilong iviksen i mas kam long opis bilong mi pas. Mi bai givim daireksen long ol polis long helpim long mekim iviksen taim ol pati i gat stretpela kot oda bilong iviksen o Samari Iviksen Oda.

"Dispela bai strongim ol polis long helpim na rausim sampela sans we ol narapela pati bai karim komplek i kam long polis dipatmen long brukim lo aninit long rait bilong ol pipel."

"Taim ol polis i wok long lukautim laip na propeti, planti taim hevi i save kamap namel long ol polis na pipel long rait bilong propeti," Kalaut i tok.

Kalaut i tok moa olsem em i no laikim ol polis long kamapim korap pasin na em i askim stretpela kot oda long lukluk gut na mekim wok long stretpela rot.

## Polisman i brukim lo

WANPELA polisman long Pot Mosbi i kalabus long Madang bihain long ol i holim pasim em na sasim em long holim wanpela gan wantaim 7-pela katres i no gat laisens long en.

Ramu Distrik Kot long Janueri 29, i painim olsem polisman, Komeng Gubag, i asua na ol i bin sasim em aninit long seksen 27, 1 (a) long Firearms Ekt.

Nesanel Kapita Distrik Komanda na Asisten Komisina, Sylvester Kalaut, i tok, Gubag i asua na kot i sasim em bihain long ol Intenel Afeas Investigeta i holim pasim em.

Kalaut i tok, ol i bin salim komplek i kam long Intanel Afeas Dairektoret bihain long

Gubag i yusim dispela gan na pretim poro bilong em long Ramu.

"Taim ol i kalabusim em, konstabel Gubag bai pinis long konstabuleri aninit long seksen 33 (2) bilong Polis Fos Ekt," Kalaut i tok.

Kalaut i tok moa olsem dispela hevi i skulim ol memba bilong Konstabuleri long luksave olsem ol tu i ken kamap long kot sapos ol i brukim lo.

"Komisina bilong Polis, Gari Baki, i tokaut olsem 2016 em i Yia bilong Disiplin na ol memba bilong Konstabuleri i mas wok stret o yupela bai go aut long Konstabuleri," Kalaut i tok.

## Baki i lukluk long disiplin, komand na kontrol

KOMISINA bilong Polis, Gari Baki, i tokim ol memba bilong Pot Mosbi Semba bilong Bisnis long moning kaikai bung long Trinde, Febueri 10, olsem em bai lukluk long disiplin, komand na kontrol insait long konstabuleri.

Komisina Baki i tok, "Plantitoktok i stap olsem ol polis i paitim ol man na planti pasin bilong brukim lo i stap insait long ol memba bilong konstabuleri."

Komisina Baki i tok aut olsem 2016 em i yia bilong disiplin

"Olsem Komisina bilong Polis, mi tokaut olsem 2016 em yia bilong disiplin. Mensemen bilong mi na mi bai no inap long larim level bilong i no gat gutpela disiplin, polisman i paitim ol lain i no gat asua, na polis i gat korapsen pasin.

"Mi bai strongim ol disiplin level we polis fos Ekt i putim long en.

"Mi bai larim ol gutpela opisa, komanda na supavaisa husat inap long mekim wok bilong ol. Ol komanda bai go long ol tes bipo long ol bai mekim ol wok insait long RPNGC.



Polis Komisina, Gari Baki, i stap long namel na tokim ol memba bilong konstabuleri husat i gat bikpela namab liklik long komandim ol polisman na meri husat i stap aninit long ol long wokim wok gut na long stretpela pasin.

"Ol polis memba husat i mekim wanpela rong pasin em RPNGC bai rausim ol.

"Aninit long lukautim bilong mi, i no gat wanpela ples bilong ol korap na les polisman i stap long konstabuleri. Nau bai mi rausim ol polis i gat kot olsem ol i paitim ol man nating na ol i gat korapsen pasin," Komisina Baki i tokim ol Memba bilong Pot Mosbi Bisnis Kaunsil.

Baki i tokim ol memba bilong bisnis komyuniti na jenerel pablik long no ken

amamasim ol polisman na tokim ol long helpim yupela long wanpela samting, nogat.

"Em i no 'helpim' taim pablik i save baim ol polisman long arestim o holim pasim ol narapela. Dispela em i wok bilong ol polisman aninit long lo i save makim na givim ol long mekim," Baki i tok.

"Ripot i kam long hetopis long ol polis husat i salim wok bilong ol long kisim mani. Dispela kain pasin i mas stop bikos em i wok bilong ol long wok nating."

# WANTOK NIUSPEPA TOKSAVE!

STAT LONG MANDE 01 FEBRUERI, WANTOK NIUSPEPA OPIS I STAP NAU LONG ANGAU DRAIV, BOROKO.

MIPELA I LUSIM ABLE COMPUTING HAUS LONG SENTRAL WAIGANI, LONG FONDE 28 JANUERI NA I GO LONG DOVE TRAVEL SEVIS HAUS LONG SEKSEN 24, LOT 25, ANGAU DRAIV (KONA BILONG LAHARA AVENUE), BOROKO.

Opis fon namba (325 2500) na fex namba (325 2579) bai stap wankain yet tasol ol email adres bilong olgeta wokman na meri bai senis. Pastaim email adres i pinis wantaim dispela mak, @wantok.com.pg, tasol nau em bai pinis wantaim @wantokniuspepa.com.

Nau yet ol telikom i no konekim ol len lain bilong mipela yet tasol yu ken ringim mipela long ol mobail namba olsem:

Ol mobail namba long ringim mipela long bisnis em:

73329467 - Elizabeth Konga Jeneral Menesa  
76210007 - Lesley Bentz Edvetaising na Sels Menesa  
72739408 - Veronica Hatutasi - Edita  
73650795 - Edvetaising

Long bisnis toktok, sapos yu save long mobail namba bilong wanpela wokman o wokmeri orait ring long mobail tasol na toktok



# Gavman i no givim inap mani – Skul Tresera

**Frieda Sila Kana i raitim**  
 GAVMAN i brukim mani bilong long TFFE i go long tripela hap. Wanpela em long ol skul infrastraksa, wanpela bilong ol skul matiriel bilong ol tisa na sumatin na las em bilong skul edministresen long wan wan de.

Tresera bilong Ward Strip Waigani Praimeri skul, Mathew Kulimbao i tok gavman nau i no givim mani we bai inap long skul i ranim gut ol edministresen bilong en long wan wan de.

“Wantaim 3000 moa sumatin na 53 tisa, K73,000 we gavman i givim long stat bilong dispela skul yia em i no inap long mekim olgeta wok bilong ranim kain bikpela skul olsem. Dispela mani em i no kamaut long baset bilong dispela yia, nogat.

Dispela em i hap bilong 2015 baset we ol i no bin baim olgeta long las yia

bikos skul yia i bin pinis. “Nau mipela i gat K20,000 tasol long akaun na em i no inap long lukautim ol wok bilong skul. Olsem na mipela i laik askim ol papamama long putim han long helpim skul bikos mipela bai i no inap long sasim projek fi,” Mista Kulimbo i tok.

Em i tok, ol bod i no laik long singaut long projek fi bikos long yia i go pinis, ol i bin kisim taim long edukesen dipatmen i mekim save long ol taim ol i sasim projek fi.

“Mipela i stap namel long siti na em i hap graun tasol bilong Insevis Koles. Olsem na mipela bai i no inap long surik i go aut. Mipela bai mas wokim ol klasrum i go antap tasol mipela i no kisim mani inap long mekim kain wok olsem,” Tresera Kulimbao i tok.

Em i tok tripela yia i go pinis em i bin putim wanpela proposal bilong K1.9

milien long wokim ol klasrum tasol dipatmen i givim em K1 milien tasol long 2013 na skul i kirapim tupela dupleks klasrum haus we i gat 4-pela klasrum insait long wan wan haus.

Pastaim planti sumatin i bin stap ausait long ol kenvas tasol wantaim tupela duplex klasrum em ol i bin daunim namba bilong ol sumatin long wan wan klas na putim o i go insait. Tasol nau planti moa pikinini i laik transfe i kam insait na ol i sot long spes.

Mista Kuliambo i singaut long ol papamama bilong ol sumatin husat i stap long kain posisen bilong wok we ol inap long helpim.

“Ol papamama i mas wokim ol fanresing o givim han nating long mekim ol wok long skul wantaim save ol i gat long kain kain wok we skul i nidim,” Mista Kuliambo i tok.

# Ward Strip Praimeri i kisim ol skul matiriel



Ol elementri sumatin bilong Waigani Elementri amamas long soim ol skul mekpas bilong ol long ai bilong ol papa na mama bilong ol. *Poto: Frieda Sila Kana*

**Frieda Sila Kana i raitim**  
**WARD Strip Praimeri Skul long Nesanel Kepital Distrik i wanpela bilong ol tripela laki praimer skul long Pot Mosbi siti long kisim olgeta skul matiriel bilong sumatin na tisa long mekim wok stat long Tem 1 bilong skul yia.**

Dispela em i kamap bikos long gutpela tingting bilong ol Bod ov Menesmen na skul edministresen long ol i patna wantaim Treid Pasifik long saplaim ol dispela matiriel na bihain bai ol i baim taim ol i kisim skul sab-sidi bilong TFFE bilong ol.

Las wik long Fonde 11 Febueri, Jeneral Menesa bilong Treid Pasifik, Wilson David wantaim ol menesmen tim bilong em i bin go long Ward Strip Praimeri Skul long givimaut ol sumatin kit na tisa kit bilong ol elementri skul i go inap long gret 8. Wanpela samting i mekim ol sumatin na ol tisa i amamas tru em long ol ekasesais buk na ol narapela samting i gat nem bilong skul bilong ol stret.

Het tisa, Misis Hane Charles i amamas tru long dispela, bilong wanem namba bilong sumatin long dispela skul em i traipela tru i winim 3,200 long praimer na 1, 200 long elementri skul. Taim TFFE mani i no go insait long skul akaun yet, long tem 1, kain namba olsem em bai hat tru long ol tisa na skul edministresen inap long painim ol skul matiriel bilong ol.

Em i tok, ol papa mama bai kisim taim long dispela, tasol nau Treid Pasifik em i kam gut na givim ol dispela samting we i namba wan long wanpela skul bai ran.

Jeneral Menesa bilong Treid Pasifik, Wilson David i tok Ward Strip em i wanpela skul i stap insait long namel bilong Pot Mosbi siti stret na gavman i baim ol tisa long mekim wok, na gavman i mas salim ol mani i go long long baim ol matiriel bilong lainim ol sumatin.

Tasol nau gavman i no putim mani yet olsem na em bai i no gutpela sapos ol pikinini bai i no inap long

statim skul long tem 1 sapos ol i no gat matiriel samting long tisa i skulim ol.

Mista David i tok, mani mak bilong kamapim matiriel bilong wanpela sumatin long elementri em i olsem K110 long wanpela tem na K300 long wanpela praimer skul sumatin long wankain taim.

“Mipela i mekim isi long ol sumatin na ol tisa long staim skul stret bikos mipela i pasim ol samting long wan wan mekpas bilong wan wan pikinini. Mipela i givim yupela ol skul samting i kam pas long yupela i mas statim skul gut. Bihain bai gavman i ken baim mipela,” Mista David i tok.

“Ol tisa i amamas bikos mipela i stretim wok bilong ol pinis. Tude mipela bai soim long long wanem kain we ol tisa na pikinini o sumatin bai brukim ol matiriel bilong ol,” em i tok.

Treid Pasifik i go tu long Sevese Morea Praimeri long Pot Mosbi Saut ilektoret long Fraide 12 Febueri na wokim wankain samting.

# Ol 38 kakaruk fama kisim trening

**Mathew Yakai i raitim**

OL 38 fama long Uria viles long wod 19 eria bilong Usino LLG long Madang provins i bin amamas long kisim savebihain long wanpela poltri projek woksop.

Dispela trening i bin stat long Sarere Februer 1 na pinis long Februeri 6. Dispela trening i bin kamap bikos long wok bung o pat-nasip namel long Madang provinsal Dipatmen ov Egrikalsa na Laipstok na Wekumarai Poltri Projek.

Em i namba wan kain trening olsem long kamap na ol komyuniti lida i amamas bikos ol lokal fama nau i ken gat save long lukautim

kakaruk prodaksen na invesmen na faming entaprais.

Trena Samuel Masawa i tokim ol lain fama olsem dispela trening bai givim moa save na tingting long ol rurel fama long kamapim senis long wok bilong ol long lukautim kakaruk na long menesmen na invesmen.

Presiden bilong Usino LLG, Joseph Kumun, husat i bin stap long lukim greduesin bilong 38 fama i salensim ol long mekim wok stret na bihainim wanem samting ol i lainim long dispela trening.

Projek Kodineta bilong Ramu Developmen Faundesin, Andrew Hawek i tok amamas long ol fama na i tokim ol long go insait long

wok bisnis moa.

Ramu Developmen Faundesin i save wok long sait long givim edvais long Madang provinsal gavman.

Mista Hawek i tok Madang i gat planti risos we ol fama i mas yusim long wok bilong ol.

Em i tok laipstok menesmen trening i mas go het taim wok maining i go het long Madang provins.

Moa long 50 lokal lain i bin gat sans tu long opim seavings akaun bilong ol wantaim MiBenk we ol trena bilong Ramu NiCo (MCC) i bin askim ol long go wantaim long promotim benking sevis bilong ol na helpim ol fama.



Ol fama i soim setifiket ol i kisim bihain long trening. *Poto: Mathew Yakai*



Ol tisa na sumatin bilong gret 4 na gret 8 long Ward Strip Waigani i soim ol mekpas bilong ol sumatin na tisa wantaim. *Poto: Frieda Sila Kana*



# PMGH i go pas long givim fainensel ripot



PMGH CEO Grant R. Muddle wantaim Fainens Kontrola bilong haus sik, Gavera Bitu i givim ripot i go long Ekting Deputy Odita Jeneral bilong Provinsal na Lokal Level Gavman na Maggie Kuli, Ekting Asisten Odita Jeneral.

**POT Mosbi Jeneral Haus sik (PMGH) i wok long senis long lukluk bilong en na tu long we bilong menesim na ranim wok administresen bilong haus sik.**

Dispela gutpela wok nau i go het wanpela moa step i go antap, taim haus sik i kamap namba wan ejensi bilong gavman long givim 2015 fainensel ripot bilong en i go long opis bilong Odita Jeneral.

Long Mande dispela wik, PMGH CEO, Grant R. Muddle na PMGH Fainensel Kontrola, Gavera Bitu yet i bin go givim 2015 Fainensel Riport long Gordon Kega, Ekting Deputy Odita Jeneral bilong Provinsal na Lokal Level Gavman na Maggie Kuli, Ekting Asisten Odita Jeneral.

Opis bilong Odita Jeneral i tok olsem PMGH em i namba wan haus sik na tu em i namba wan long wanpela gavman opis long givim 2015

fainensel ripot bilong em.

“Haus sik em i no bilong wok bilong medikol tasol. Ol medikol profesenai i gat bikpela wok tru, tasol i gat ol narapela pipel long PMGH i save mekim gutpela wok tasol i no save kisim luksave tumas. Tasol wok bilong ol em i bikpela samting tu long helpim PMGH long go het long makim ol bikpela tingting bilong mipela long “Gutpela Helt”.

“Mi laik tok amamas long PMGH Fainensel tim wantaim lida bilong ol, Fainensel Kontrola, Gavera Bitu long mekim ol wok i bihainim ol nupela sistem na long stretim olgeta fainensel wok bilong mipela,” Mista Muddle i tok.

Veliu bilong stretpela na trupela fainensel ripot i kamap long taim em i gutpela long helpim PMGH i stap insait long baset lain bilong en, na long putim mani i go long baim ol nupela teknoloji,

na we mipela inap sevim sampela mani na ol mani i ken go long helpim long kamap ‘Gutpela Helt’ mak bilong mipela.

Dispela mun bai fainensel tim i putim aut peirol long internet peirol sistem, wantaim koneksen bilong baiometriks we bai kamap long ol wik i kam long kamapim gut wei bilong monitarim wok bilong ol wokman na wokmeri na long ol pei bilong ol, na long wokim olgeta ripot.

“Fainensel dipatmen em i wanpela bilong ol tim bilong mipela long PMGH we i gat bikpela tingting long mekim wok bilong ol gut. Ol i gat bikpela wok long mekim, na long tok tru, ol i wok long kamapim standet bilong givim aut sevis long olgeta haus sik long kantri na ol narapela gavman dipatmen tu. Mi amamas long ol wok ol i kamapim pinis.” Mista Muddle i tok.

# Medikol sip i gat laboretori

**Frieda Sila Kana i raitim**

MV YWAM PNG Trening na Medikol Sip i opim moa sevis bilong en wantaim wanpela nupela laboretori long go wantaim tupela nupela operesen klinik bilong dentis na optalmoloji o sik bilong ai.

Dispela laboretori bai mekim wok bilong Medikol tim i isi tru long taim ol i go long ol bus na ailan we i longwe tru long ol taun haus. Ol bai sekim blut long lukim sik malaria, tubekulosis na leprosi na ol sampela narapela sik tu. Pastaim long dispela, ol medikol tim i save hat liklik long skelim wanem kain sik tru i kisim ol pipel long ples tasol nau wok bilong ol bai kamap isi tru.

Australia Petron bilong YWAM Sip, Mike Reynolds i tok, ol medikol tim bai wok bung yet wantaim ol provinsal medikol sevis na ol bai givim riferel pas long ol sikman na meri we ol yet i no inap long helpim antap long sip.

MV YWAM PNG wantaim

100 volantia kru i long sip i bin kam sua long Pot Mosbi long Mande las wik. Tasol bihain stat long Fonde 11 Febueri bai i gat 350 moa volantia husat i bin rejista long wok wantaim YWAM Trening na Medikol tim bai go antap long sip na redi long go long ol provins.

Ol volantia i kam long olgeta hap bilong wol na Papua Niugini wantaim. Wan wan bilong ol volantia bai stap olsem tupela wik i go tupela mun samting wantaim tim long sip na long graun tu. MV YWAM PNG bai stap long ol 5-pela Sauten Rijon provins na Huon Galp long Morobe Provins insait long 5-pela mun.

Bihain long ol i opim tupela nupela klinik na operesen tieta antap long sip long Fraide 12 Febueri, sip MVY-WAM PNG ii lus lain na igo long Galp provins long statim ol wok.

Sip i gat 4-pela ol liklik bot we bai helpim ol tim long go sua na tu long bringim ol siklain i kam antap long sip.



Atis piksa bilong leboratori antap long Sip MV YWAM PNG. Foto: Frieda Sila Kana

# BSP sapatim yet Operesen Opim Hat



L-R Russell Lee, Kodineta bilong Opim Hat Intenesenel, Kathy Johnston, Dokta Noah Tapaua, Hari Rabura, Dokta Cornelia Kialalang na Jacque Ware.

**BANK SAUT PASIFIK (BSP) i kam gut gen long helpim wok bilong Operesen Opim Hat wantaim K100,000 long las wik.**

Wanpela toktok i kam long BSP long i tok dispela mani em i olsem wanpela

Valentine De presen i kam hariap tumas.

Sampela Papua Niugini siklain i kisim hat operesen long stretim wok bilong lewa bilong ol long las wik taim Operesen Opim Hat (OOH), i kamap long Pot

Mosbi Jeneral Haus sik, bikos long ol donesen olsem bilong BSP.

Olsem em i save kamap olgeta wan wan yia taim ol saveman na meri dokta na nes bilong Australia i save kam bung wantaim ol dokta

na nes bilong PNG long wokim ol dispela bikpela operesen, dispela taim i bin gat 19 Australia medikol profesenai i kam long Pot Mosbi stat long Sande Febueri 7 yet.

I gat sikspela Papua Niugini speselis we Dokta Noah

Tapaua i go pas long ol na ol narapela olsem, yangpela meri trening sejen, Dokta Elisabeth Alok, Dokta Cornelia Kialalang, Profesa Nakapi Tefuarani, Profesa Sir Isi Kevau na Dokta Jack Amina.

OOH i save kamap long olgeta yia tasol long 2016 em bai kamap tupela taim, wanpela long dispela em i kamap nau long dispela mun na narapela bai kamap bihain long mun Julai.

BSP Deputy Jeneral Menesa bilong Human Risos, Hari Rabura i bin stap long givim dispela sek i go long tim bilong OOH na Siameri bilong OOH Kathy Johnston.

“Planti pipel bai gat wanpela moa sans long kisim OOH, na BSP em i gat bikpela amamas long helpim dispela kain gutpela wok. Tenkyu tru long olgeta lain insait long dispela program.” Mis Rabura i tok.

Long stat bilong OOH 23 yia i go pinis i kam inap nau,

ol tim i bin helpim 930 sikman, meri na ol pikinini wantaim hat sejeri. Sampela em ol i katim opim lewa na stretim na sampela ol i yusim tasol teknoloji long go insait long lewa na stretim.

Siameri bilong OOH, Kathy Johnston i tok olsem dispela program nau i wok long lukluk long developim ol lokal Kadiolojis o dokta bilong stretim lewa wantaim ol sejeri tim bilong ol.

“Dispela program em i bilong helpim ol lokal dokta long kisim moa save na ekspiriens long bihain ol yet inap long mekim dispela kain wok bilong sevim laip,” Misis Johnston i tok.

“Sapos ol dispela kain bikpela helpim long ol kopret ogenaisn i no gat, OOH bai i no inap long mekim gutpela wok tu. Na long BSP, em i gutpela tru long lukim olsem lida benk bilong yumi i wok long stap strong yet wantaim dispela wok helpim,” em i tok.



## Nupela ambaseda bilong Amerika

Embasi bilong Amerika long PNG i gat nupela ambaseda.

Em i wanpela meri na nem bilong en em Catherine Ebert-Gray.

Opis bilong Embasi bilong Amerika i tokaut long dispela mun.

Em i kisim ples bilong pastaim man i go pinis bihain long 4-pela yia wok bilong em long PNG, Ambaseda Walter North husat i bin kam long PNG long yia 2012.

Catherine Ebert-Gray i kamap Ambaseda i lukautim PNG, Solomon Ailan na Vanuatu.

Ambaseda Ebert-Gray, i wanpela Keria memba bilong Senia Foren sevis, Klasov Ministas-Kaunsela na wok em i lusim em na kam

long PNG em Deputi Asisten Seketeri long Biuro bilong Edministresen opis bilong lukautim Lojistik Menesmen, posisen we em i bin holim long yia 2011.

Wanpela long ol namba wan wok em i bin kisim olsem Foren Sevis opisa em long kam long Papua Niugini, Solomon Ailans na Vanuatu.

Em i bin wok tu long ol narapela hap olsem Filipin, Morocco, Mali, Gemani na Togo.

Long ol wok bilong em, em i wokim gut stret olsem menesa long pos operesen long bildim strongpela malti nesenel patnasip.

Embasi bilong Amerika long Mosbi i amamas na tok welkam long en long kam bek long PNG na kisim dispela nupela wok.

## Glasim kos bilong jenda beis vailens long PNG



**LONSIM NUPELA TULKIT:** Mis Natasha Stott-Despoja na Misis Lesieli Taviri (Siamei bilong PNG Bisnis Kolisen bilong ol Meri na Eksektiv Dairekta bilong Origin Eneji PNG) long taim bilong lonsim nupela tulkit long Mosbi las wik.

*Poto: Australia Hai Komisn Midia*

NUPELA tulkit bai helpim ol bisnis long klis gut long hevi na kikkbek we jenda beis vailens na i kamapim na divelopim ol polisi long sapotim ol woklain bilong ol.

Ambaseda bilong ol Meri na Gels long gavman bilong Australia, Natasha Stott-Despoja, i bin stap long lons bilong tulkit ol i kolim long, "Costing the impacts of gender-based violence to business" – long Mosbi.

"Edresim jenda beis vailens i no stretpela samtiring long mekim, tasol em gutpela long sait bilong bisnis. Tru, hevi we dispela i kamapim long ol meri i no gut stret, ol bisnis tu i save kisim hevi taim ol woklain bilong ol i no go long wok, na wok i no kamap na ol i rausim ol woklain," Ambaseda Stott-Despoja i tok.

"Ol kampani i ken stat wantaim ol liklik samting olsem kamapim ol awenes

posta na lukim olsem ol woklain i save long ol sapot sevis o we ol i kewn kisim helpim longf dispela kain hevi.

"Gutpela samting i ken kamap long invesmen na glasim ol jenda beis vailens i kamap na kos na tu, ol program long helpim ol woklain na i gat ful sapot long olgeta level bilong menesmen.

"Dispela tulkit bai helpim ol bisnis long kirapim rot long painim kos bilong ol jenda vailens na long glasim sapos dispela bai gutpela na bai wok long bihain taim," Mis Stott-Despoja i tok.

Ovasis Developmen Institut i bin karimaut wok risets long kos we ol bisnis i save bungim long jenda beis vailens long PNG na em i kamapim dispela tulkit. Gavman bilong Australia i bin fandim dispela tulkit aninit long eid program bilong Australia.

## Ol Bogenvil meri i gat nupela opis bilding

LAS wik i lukim nupela opis bilong ol meri i op long Buka insait long Atonomas Rijon bilong Bogenvil (ARoB).

Ambaseda bilong ol Meri na ol Gel long Gavman bilong Australia, Natasha Stott-Despoja, i bin joinim ol lain bilong Atonomas Bogenvil Gavman (ABG) long opim dispela nupela Bogenvil Wimens Federesen opis.

Opis ya bai sapotim na strongim lidasip bilong ol meri long ARoB.

"Mipela i amamas long dispela nupela opis we bai helpim Federesen long strongim lidasip bilong ol meri long rijon," Ambaseda Stott-Despoja i tok.

Em i tok nupela bilding ya i gat opis bai givim ol meri hap bilong wok na toktok long ol bikpela samting ol i gat wari long en.

Em i tok opis i sanap long gutpela ples klostu long maket ples we ol meri i save bung long en long salim ol kaikai bilong ol.

Ambaseda Stott-Despoja i bin tok tenkyu long rijonal memba bilong ARoB, Joe Lera, long kontribusen bilong em long sanapim dispela nupela opis na ol fenitja, na kompyuita bilong opis.

Ol i wok long bilding wanpela kafe o stua long salim ol kaikai samting insait long nupela bilding.

Ambaseda i tok kafe projek daunbilo bai helpim ol meri i

lainim ol nupela skil long ranim ol menesim ol bisnis na tu, kamapim mani bilong Federesen. Tu, bai gat toilet na ples bilong toilet na waswas bilong ol meri, Mis Stott-Despoja i tok.

Em i bin givim luksave long planti lain we i bin helpim wantaim fanding olsem Australia we i bin givim moa long K350,000 aninit long eid o helpim program bilong em long sanapim opis spes na kafe.

Tu, em i bin tok tenkyu i go long Rijonal Memba, Joe Lera long fandim daubilo hap we kontrak i bin kamap aninit long ABG.

Australia i sapotim jenda ikwaliti long ABG aninit long jenda invesmen plen (2014-19) we manimak inap long AuD\$14 milien.

Plen i lukluk long tripela kiera olsem daunim jenda beis vailens na givim sapot sevis long ol lain i bin kisim hevi long dispela na ol i orait, strongim ol meri lidasip na toktok long ol lain i wokim ol disisen na kamapim gut sans long ol meri long go insait long ol samting bilong mekim mani long ol.

Australia i wok wantaim ABG na PNG gavman na em i putim moa mani i go long Bogenvil long sapotim gutpela gavanens na wok long kisim sevis i go aut, promotim gutpela wok long sosel sait, gro bilong ikonomi na strongim ol meri.



Ambaseda Stott-Despoja wantaim ol meri memba bilong Bogenvil Wimens Federesen.

## "Save na mekim"

*I kam long liklik buk, Stori na Wok, Elizabeth Cox i raitima*

## Plantim Moa Bin na Kumu

Toksave: Taim ol man i save tok sampela pikinini bilong yumi i no save kaikai gut, ol i no min olsem ol i hangere olgeta taim. Planti pikinini i save kaikai pulap long ol kaukau, yam, mami, taro na saksak. Tasol dispela kain kaikai tasol i no inap long bodi bilong pikinini na bikpela manmeri wantaim. Strongpela kaikai olsem kaukau o saksak i givim "bensim" tasol long bodi. Em i helpim yumi painim strong bilong wok. Tasol pikinini i kaikai olsem tasol bai i no inap kisim strongpela bun na masel. Na sapos kaikai bilong papamama na pikinini i sot long kumu, bai yu lukim ol sik na sua i kamap long ol nating. Kumu bilong yumi ol i samting tru.

Pasin bilong gaden bilong yumi long ples em i olsem. Yumi save kliaim bikpela ples na planim strongpela kaikai, na planim kumu na bin insait long ol. Bin i save karim pastaim, na kumu bihain. Planti taim yumi kaikai long ol, na ol i pinis, na yumi wetim strongpela kaikai i redi. Olsem na sampela taim yumi save tok olsem sot long kumu o bin, ol i pinis.

Long gutpela gaden kaikai bilong famili yumi mas i gat bin na kumu olgeta taim. I no gutpela yumi kaikai kumu tasol, na i no gutpela yumi kaikai yam o saksak tasol. Yumi mas traim na kaikai dispela kaikai, olgeta taim.

Olsem na ol mama mas i gat tingting long planim bin na kumu planti taim long wanpela yia. Planim pastaim long wanpela hap, na taim ol i gro liklik, orait planim gen long narapela hap. Na bihain namba tritaim gen. Olsem na taim nambawan lain bin i pinis, narapela bai stat long karim.

Pinat em i save mekim wankain wok olsem ol bin. Em i save strongim bun bilong man. Nogut yumi planim traipela gaden pinat long wok bisnis tasol, na pikinini bilong yumi i sik nating na hangere.

Taim bin na pinat i pinis long gaden dikim ol lip na rop i go bek long graun na planim gen narapela kain kaikai. Bai yu lukim olsem lip bin na pinat i grisim gut graun bilong yu.

Wing bin o foakona bin i nambawan bilong bin bilong yumi, winim bilong narapela kantri tu. Planim planti win bin. Bus bin, na snek bin tu i save kamap gutpela kaikai.

Wokim gutpela stik o banis bilong bin long go antap na karim gut. No ken wokim longpela stik tumas.

Sapos yu laik kaikai lip bilong bin, no ken pinisim olgeta lip na stik tasol i sanap, na bai bin i no ken karim gut pikinini.

Ol Meri Inap Long Mekim Wanem?

- Planim kankain gaden bin
- Lainim gut we bilong wokim banis bilong bin
- Traim kankain we bilong kukim bin (olsem ol yangpela wing bin, o kon)
- Wokim plen bilong planim bin na kumu olgeta tupela tupela mun, olsem na yumi no inap sot long dispela gutpela gaden kaikai.



# Stretpela pasin i mas stap long PNG - Asbisop John Ribat i tok

**SIAMAN bilong PNG Kristen Lidas Alaiens long HIV na AIDS, na Asbisop bilong Pot Mosbi Katolik Asdaiosis, Asbisop John Ribat i tok long dispela wik olsem pasin bilong injastis em inap long bagarapim wok developmen long Papua Niugini.**

Ol pasin nogut na pasin bilong brukim lo i stap long olgeta hap bilong Papua Niugini sosaiti bai i no inap long helpim developmen bilong kantri.

Ol pasin no gut we ol man na meri i wokim long ol narapela manmeri na pikinini i kamap longpela taim na nau em i kamap olsem wanpela kalsa o pasin bilong em yet we ol lain husat i bagarapim narapela, i no moa pilim sori o pret long mekim.

Injastis o pasin no gut em i oposit o narapela long gutpela pasin o jastis long pipel bilong yumi long taim ol i laik kisim sampela helpim long ligel hevi o sosel jastis na long kisim ol samting bilong kaikai, yusim na ol sevis.

Injastis em i kamap long taim i no gat jastis o stretpela pasin. Em i minim olsem taim ol sevis na ol kaikai na ol narapela samting olsem mani i go long ol pipel, em i no go long wankain mak. Taim ol wankain pipel i no kisim wankain sevis na ol man na kago em i no stret na em i brukim lo na rait bilong ol pipel.

Jastis em i min olsem olgeta lain i kisim ol samting olsem sevis long wankain mak na long skel bilong ol wan wan na i no tumas na i no ken liklik tumas. Em i pasin bilong rispekim rait bilong ol narapela.

Injastis em i save daunim ol samela pipel na ol i no save kisim gutpela helpim we em i bilong ol insait long developmen plen bilong kantri long Visen 2050.

Insastis i kamap taim;

Ol pipel i no gat wankain sans long kisim ol sevis long ol wod bilong ol, distrik bilong ol na long provins bilong ol,

Taim ol mama long rurel eria bilong PNG i wok long dai yet long taim bilong karim bebi na i no gat gutpela ol helt fasiliti,

Taim ol man, meri na pikinini i wok long kisim taim yet na dai long hangre bikos ol kaikai na marasin i no go hariap long ol olsem nau long taim bilong El Nino.

Taim olgeta pipel i no kisim wankain mak long sosol na ikonmik laip bilong ol,


Taim ol reip o pasin bilong bagarapim ol meri na slip wantaim ol na ol yangpela meri i kisim bagarap yet na lo i no save givim mekim save hariap long ol lain husat i kamapim bagarap long ol,

Taim ol pipel husat i gat binatang bilong HIV, na ol seks woka o ol K2 meri, na ol gei man na lesbien meri i kisim tok bilas long ol narapela lain, na ol man i bagarapim ol na long taim i no gat lo man o lo meri inap long helpim ol.

Gutnius bilong God i kisim bek man insait long pikinini bilong em Jisas Kraus em i bilong pasin bilong laikim tru narapela, jastis na rekonsiliesen o pasin bilong kamapim wanbel namel long ol birua lain.

Em i gutnius bilong 'stretim ol pasin' na long bringim sindaun bilong man na meri i go bek long kain laip we God i bin laikim long en olsem ol wan wan pipel, na olsem wanpela Kristen komyuniti bilong ol bilipman na meri, na long sosaiti na envairomen. Em i prea bilongmi olsem Holi Spirit bai opim ai bilong yumi long luksave olsem injastis em i wanpela samting bilong pait we birua bilong yumi seten i save yusim long bagarapim yumi.

Olsem wanem bai Papua Niugini inapim olgeta developmen tingting bilong



**Asbisop John Ribat, bilong Pot Mosbi Asdaiosis na Siaman bilong PNGCLA.**

*Poto: Wantok*

en long karampaim olgeta wan wan pipel taim injastis i stap yet. Na taim vailens o pasin bilong pait nap ret i stap yet long planti pipel we i mas kisim ol gutpela samting na sevis long ol distrik, provins na kantri developmen plen bilong yumi?

Mi laik askim Praisim Minista bilong Papua Niugini, Honorebel Petoer O'Neill long strongim maus bilong mi na ol narapela PNG Kristen Lidas Alaiens long HIV na AIDS na givim toktok bilong trupela jastis o stretpela pasin long olgeta, long taim yu opim 2016 Lidas Samit long 17 na 18 Febueri, 2016.

Jastis i mas stap long PNG long olgeta pipel na tu long wan wan manmeri na pikinini sapos yumi laik lukim ol tingting bilong developmen i karamapim olgeta.

## Yut ministi strongim felosip wantaim kalabus lain

BIHAINIM Yia bilong Marimari insait long wol Katolik Sios kalenda, ol peris yut insait long 14-pela peris long Pot Mosbi Asdaiosis i redim ol plen bilong ol long dispela yia.

Long las wik, olgeta yut insait long ol peris i bin bung long Sen Peter Sanel Peris long Erima, Mosbi long toktok long ol program na ol samting i karamapim ol.

Wanpela long olprogram ol yut ministri long Sen Peter Sanel peris i gat long en em long Prison Ministri.

Aninit long dispela Prison Ministri, ol i save go lukim, lotu wantaim na sea wantaim ol kalkabus lkain insait Maksimum Sekyuriti Yunit long Bomana Haus kalabus ausait long Mosbi.

Long dispela Sande, ol yut long Sen Peter's wantaim peris pris bi-

long ol bai go long Bomana na felosip lotu na sea wantaim ol Maksimum Sekyuriti kalabus lain.

Long wankain taim tu, ol narapela sios tu i save mekim ol wok ministri na go visitim, pre na sea wantaim ol kalabus lain.

Long dispela yia tu, aninit long Yia bilong Mesi o Marimari long Ksatolik Sios kalenda, sios i askim ol memba bilong em long mekim ol wok pilgrim.

Long PNG, Bleset Peter ToRot ples long Rakunai i wanpela we ol Katolik i ken go long mekim wok pilgrim.

Ol lain long Pot Mosbi Asdaiosis i kisim askim long mekim pilgrim wokabaut i go long Yul Ailan, Bereina long Sentrel Provins em ples we ol namba wan Katolik misineri i bin kamap long en.

## Pater Patrick Baria i peris pris bilong Arawa

LONG Sande Febueri 7, ol Katolik Kristen manmeri bilong Arawa Peris i selebretim instelesen bilong nupela peris pris bilong ol, Pater Patrick Baria. Em ikisim ples bilong Pater Thomas Terere husat i go long Tubiana Peris long Sentral Dineri long Sentral Bogenvil.

Pater Thomas i bin givim ki na buk Baibel long Pater Patrik long makim wok bilong em long autim Gutnius olsem Bikipela Jisas Kraus i bin mekim.

Pater Patrick Baria i gat ol narapela bikipela wok tu long mekim. Bisop bilong Bogenvil Daios, Bernard Unabali i makim em Vika Jeneral, na tu, em bai go pas longol peris bilong sentral dineri.

Olsem na long taim em i toktok, Pater Patrick askim ol Katolik Kristen long helpim em long prea na bai em imekim wok bilong autim Gutnius long ol pipel bilong Bogenvil.

Long Sande Febueri 21, Pater Patrick Baria bai i wokim instelesen Misa bilong Pater Thomas Terere long nupela peris bilong em long Tubiana



**STORI TASOL**  
*wantaim*  
**Fr Paul Liwun**

## DOG I BAIM MIRA

NIA Christina, wanpela pren bilong mi long Facebook, i bin posting wanpela naispela stori bilong dog na mira.

Dog em i stap long wanpela ples i long we tru long taun.

Em i stap laip gut long ples, tasol sampela taim em i no amamas tu bikos em i laik kisim olgeta samting.

Bikos em i tok; "Sapos mi gat olgeta samting, laip bilong mi bai amamas tru".

Wanpela taim em i harim ol haus lain i toktok long mira. Ol i tok: "Sapos yumi gat naispela mira, yumi bai lukim yumi yet stret".

Em i tu harim olsem planti manmeri i save go long taun o narapela bikipela siti na baim mira.

Dispela kain toktok i kirapim tingting bilong em. Na em i gat strongpela laik i go long taun na baim wanpela mira bilong em yet, na em i ken lukim em yet na amamas i stap.

Olsem na em i hat wok long bungim mani bilong em na taim em i lukm mani inap pinis long baim wanpela mira, mi redi long go long taun.

Wanpela bikipela moning tru, taim kakaruk i no kraik yet, em i kirap na wokabaut.

Em i go i go i go....kalapim bikipela na liklik maunten, tasol inap long san i go daun pinis em i no kamap long taun yet. Taim bikipela tudak i kamap pinis, em i slip long rot tasol.

Narapela moning, taim tulait i bruk, em i kirap na wokabaut gen. Em i taitim bun stret.

Em i tok: 'Mi mas kamap long taun bipo long 12 kilok'. Em i tru, em i kamap long taun bipo long belo taim.

Em slip malolo liklik aninit long wanpela diwai arere long taun. Bihain, taim em i pilim strong pinis, em i wokabaut i go long stua ol i salim mira long en.

Taim em i kamap long wanpela bikipela stua, em i kirap nogut tru bikos long pes bilong em, i gat 80 bikipela mira i stap.

Na i mekim em i kirap nogut moama yet, bikos insait long mira, i gat 80 dog i stap. Taim em i lukluk long ol, olgeta 80 dog tu i lukluk long em.

Taim em i wokabaut i go klostu long mira, olgeta 80 dog tu i wokabaut i kamap long em.

Em i amamas tru bikos nogat wanpela long ol 80 dog i kros long em.

Maski em i wanpela nupela dog long taun, tasol olgeta 80 dog i no kros o i no pait wantaim em.

Taim em i lukluk long ha kais, olgeta i lukluk long hankais. Taim em i movim tei bilong em, olgeta i movim tei bilong ol tu.

Nau em i sanap longpela taim pinis na em i les olsem na em i sindaun.

Em i kirap nogu tru bikos olgeta 80 dog i sindaun na lukluk long em. Taim em i slip, olgeta i slip. Taim em i pasim ai, olgeta i pasim ai na slip.

Dispela samting i mekim em i amamas tru long stap long dispela stua, bikos i nogat wanpela dog i kros long em.

Amamas i pulap tru insait long em, olsem na em i tok, 'maski long baim mira bilong mi yet. Mobeta mi go bek na sapos mi no amamas stap long ples, bai mi kam bek na stap wantaim 80 gutpela na naispela pren bilong mi long hia.

Olsem na em i kirap long slip, na wokabaut i go bek. Em i lukim olgeta dog insait long mirror tu i kirap na wokabaut i go. Taim em i stop na tanim bek lukim ol, olgeta i tanim bek na lukim em tu.

Em i go bek long ples. Na planti taim moa em i go bek long dispela bikipela stua na lukim em yet insait long mira, bikos em i amamas tru.



# Skulim ol studen long trupela mak bilong developmen



**DISPELA** wik em i namba foa wik bilong ol studen long skul na yumi harim pinis olsem pait i kamap namel long ol studen. Sampela i kisim blut, na ol arapela poro bilong ol i pret long skul bikos ol wanskul yet i kamapim birua pasin. Bai dispela birua pasin i go yet inap long taim 2016 skul yia i pinis.

Ol skul long Mosbi na Lae i gat nem nogut long birua pasin namel long ol wanskul yet, na wantaim ol studen bilong arapela skul. Dispela kain pasin bilong kamapim pait na pretim ol arapela studen em i wanpela nupela kalsa bilong ol skul long siti. Ol i mekim kain pasin olsem long soim strong bilong ol o sampela taim ol i so-op tasol long ol arapela wanlain bilong ol. Planti taim wanpela studen i kamapim trabel autsait na ol wanlain bilong em i helpim em na kamapim pait. Dispela pasin bilong bekim pait i stap strong yet long sampela hap bilong PNG na yumi lukim ol skul

studen tu i holim strong yet dispela pasin nogut.

Oltaim i save gat ol strongpela tok lukaut i kam long ol bikman bilong Edukesen Dipatmen, ol tisa, na skul bot, tasol i luk olsem gutpela edvais bilong ol i no go insait tru long het bilong ol studen. Ol i harim na stopim trabel sotpela taim tasol na i no long-taim bai pait i kamap gen.

I gat ol subjek bilong skulim ol pikinini long stretpela pasin bilong stap gut wantaim ol arapela wanlain bilong ol, soim rispek long raits bilong ol arapela na ol rot bilong daunim belhat na tingting bilong pait. Ol dispela gutpela skul i kamap insait long klasrum, tasol long taim ol studen i lusim klasrum na kam autsait, ol i lusim ting long ol dispela gutpela stia toktok. Em i soim olsem ol i no lainim wanpela samting, o ol i no laik senisim pasin bilong ol.

Yumi ol papamama tu i mas luksave long dispela pasin nogut

na helpim ol pikinini long senisim pasin bilong ol. Sapos papamama i bihainim yet pasin bilong bekim pait, bai ol pikinini tu i no inap senis, ol bai bihainim yet bikos ol i bilip em i stretpela pasin bilong soim strong bilong ol. Ol i ting sapos ol i no bekim pait, bai ol birua i tok bilas na rabisim nem bilong ol.

Long taim bilong ol tumbuna dispela pasin bilong sanap strong na pait wantaim ol birua i bin strong tru. Sapos ol i no strong bai ol birua i pinisim ol. Tasol tude, PNG i wanpela kantri husat i laik soim ol arapela kantri olsem yumi tu i develop na inap long stap olsem ol tu. Ol lida bilong yumi i raun long wol na apim nem bilong PNG. Yumi givim nem long go pas long ol bikpela bung bilong ol wol lida. Yumi putim nem long go pas long ol bikpela spot long rijon na wol. Ol dispela gutpela samting i soim olsem PNG i lusim ol pasin nogut bilong ol tumbuna na i tok save olsem yumi kamap

ol saveman meri husat i yusim het na tingting bilong yumi long sindaun gut.

Olsem na long taim yumi harim ripot bilong pait i kamap namel long ol studen bilong wanpela skul, o namel long tupela skul, ating yumi mas skelim yumi yet na painim ol rot long senisim dispela pasin nogut bilong ol pikinini. Sapos ol i no senisim pasin tude, bai ol i kamap wanem kain ol manmeri long bihain taim? Bai ol inap long sindaun gut wantaim ol kain kain pipel bilong ol narapela provins o nogat? Bai ol i soim dispela kain eksampel long ol pikinini bilong ol tu o nogat?

Yumi tok PNG i Kristen kantri, tasol dispela kain pasin bilong bekim dinau long taim wanpela man i solapim yu em i no trupela Kristen pasin. Bikpela yet i bin tokim yumi pinis olsem, sapos wanpela man i solapim yu, orait yu tanim na larim em i solapim narapela sait long pes. Bai yumi

inap mekim olsem o nogat?

Senisim pasin bai i no inap kamap wantu tasol, nogat. Long taim ol pikinini i liklik yet, yumi mas skulim ol na soim gutpela eksampel oltaim. Sapos ol i asua, orait soim stretpela rot long bihainim. Yumi mekim olsem bai ol i lainim isi isi na long taim ol i go skul, bai ol inap long sindaun gut wantaim ol wanlain bilong ol na wantaim ol studen bilong narapela skul.

Mak bilong developmen em i no stap long hamas ol bikpela haus na ol foa lein kolta rot na bikpela bris na ol spot graun we i kostim planti milien Kina. Nogat. Trupela mak em i stap long pasin bilong ol pipel. Sapos pasin bilong yumi i soim olsem yumi gat rispek long lo na oda na raits bilong ol arapela manmeri, orait yumi winim mak. Putim dispela toktok insait long het bilong ol pikinini nau na bai ol i ken bihainim na holim strong kantri bilong yumi long bihain taim.



Published Weekly, Thursday, for Word Publishing Company, Ltd. P.O. Box 1982, Boroko, NCD Papua New Guinea

Telephone: (675) 325 2500 Fax: (675) 325 2579

Email: [editorial@wantok.com.pg](mailto:editorial@wantok.com.pg)

Pe bilong wanpela yia 52 niuspepa

<b>Ples:</b>	<b>Air:</b>
PNG	K220.00
AUSTRALIA	US\$110.00
ASIA PACIFIC na JAPAN	US\$150.00
AMERICA na EUROPE	US\$210.00

**General Manager**  
Elizabeth Konga

**Editor**  
Veronica Hatutasi

Word Publishing Company Limited is owned by the four major churches of Papua New Guinea - Catholic 55%, Lutheran 25%, Anglican 10%, United Church 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general term acceptance are available at Word Publishing Company Ltd and are set out full on the display advertising form.

## Papamama mas helpim pikinini kamap wokmanmeri bilong God

**TAIM i senis na planti samting i senis.**

Dispela i wankain long pasin bilong lotu tu. Planti sios i lukim namba bilong ol wokman na wokmeri i go daun.

Na planti ol haus lotu i no gat moa ol manmeri i save go lotu long en. Ol i stap haus nating.

Taim bilong lotu wanpela i ken lukim liklik lain tasol i go na planti bilong dispela ol lain em ol lapun.

Long dispela yumi i ken askim bilong wanem na kain samting i wok long kamap?

Ansa em olsem, i no gat rong long kain senis i kamap.

Ating manmeri i sik, o sios lida ol i laikim harim tok i no moa stap na manmeri i no laikim nupela lida na olsem ol i no laik long go lotu. I gat planti ansa long givim long bekim askim bilong senis i kamap.

Tasol wanpela bikpela askim yumi i ken tok em olsem, ol manmeri bilong tude i les tasol long go lotu.

Long wankain pasin papamama i laikim pikinini i mas wok mani na helpim ol o bekim hatwok bilong ol.

Ol i no laik bai pikinini i go mekim wok misin we i no gat helpim i go long ol.

Long dispela as ol pater, sista o pastor na sios lida i wok long sot.

No gat planti yangpela i kisim ples bilong ol olupela lain.

Na wok bilong autim tok bilong God i wok go liklik.

Tasol SkelimTingting i laik askim, husat i wokim olgeta?

Long buk bilong Stat o Jenesis Sapta 1 em i tok long God i wokim olgeta samting long heven na long graun na dispela em long man wantaim.

Na long Gudnius bilong Metyu 6:33 Jisas Bikpela i tok painim pastaim Kingdom bilong God na olgeta arapela samting manmeri i laikim bai go long ol.

Ansa bilong olgeta wari bilong askim bilong yumi i stap long dispela tupela Buk.

Na sapos Papua Niugini i tok olsem em i Kristen kantri na ol manmeri i bilip long God, bilong wanem ol manmeri i mas wari long ol samting we God husat i wokim ol dispela samting yet i tok em inap long givim.

Sapos manmeri i bilip tru em i ken lukim tru kaikai bilong tok i stap long Gudnius bilong Metyu 6:33.

Planti taim ol manmeri i laik bai ol i

samting i mas kamap bihainim laik bilong em na kamap long taim bilong em.

Tasol God i tok ol i samting i save kamap bihainim laik na tingting bilong em.

Taim manmeri i no bihainim tingting bilong God, bikhet pasin i save kamap na ol i no inap long bihainim pasin tru we i soim rot i go long heven.

Long Metyu 7:14 Jisas yet i tok rot bilong go long heven i liklik na i no isi long bihainim. Liklik lain i bihainim dispela rot long wanem narapela rot i go long ples daun i bikpela, i isi na planti manmeri i bihainim dispela rot.

Dispela astingting i mekim na olsem manmeri i laik bai ol i gat isi laip, pikinini bilong ol i go wok mani na ol i stap tasol na i no ken hatwok.

Long dispela as tu kain pasin i bihainim tasol tok i stap long Metyu 7:14 long liklik manmeri tasol i bihainim stretpela rot.

Ating taim Jisas i kambek em bai lukim liklik lainim tasol, em i tru ah?

Yumi i mas senis na sapatim pikinini long mekim wok bilong God bai tok bilong em i mas goaut moa.

Lukim websait bilong mipela

[www.wantokniuspepa.com](http://www.wantokniuspepa.com)



# Edita bilong Wantok raitim buk bilong Bogenvil Kraisis

**Frieda Sila Kana i raitim**  
EDITA bilong Wantok Niuspepa, **Veronica Hatutasi** i gat nem nau namel long ol buk raita bilong Papua Niugini, wantaim namba wan buk bilong em "Behind the Blockade", we em bai lon-

sim long Fraide wik bihain long Gren Papua Hotel insait long Pot Mosbi.  
Dispela em i stori long laip bilong em yet long bikipela hevi i bin kisim Ailan Bogenvil long leit 1980s i kam inap long 2000 taim ol papa graun bilong Bogenvil Kopa Main i

kirap long pasim Panguna main na bagarapim olgeta developmen long Arawa, Lohoho, Kieta na Toniva taun long Sentral Bogenvil.

Wantaim stori bilong dispela hevi we i kisim laip bilong planti tausen man, meri na pikinini bilong Bogenvil na Papua Niugini, long taim dispela hevi bilong main i go bikipela na bung wantaim kain kain ol narapela hevi namel long ol 'ret skin' bilong Papua Niugini na ol Bogenvil yet, Misis Hatutasi i soim tu stail na kala bilong Bogenvil Ailan insait long dispela buk bilong em.

Sapos dispela hevi - Bogenvil Kraisis - i bin go het yet na bagarapim tru ailan na ol pipel bilong en, ating ol toktok stori bilong Veronica inap long holim piksa bilong Bogenvil long bihain, PNG na ol narapela kantri ausait inap long tingim dispela ples em i gat wanem kain lukluk na stail.

Em i stori moa long ol naispela nambis, solwara, san i lait, ol pisin, eminal na ol naispela pasin bilong ol pipel bilong Bogenvil yet.

Ating insait long dispela buk em yu inap lukim olsem insait long dispela ol yia bilong hevi, 'wantok sistem' i

no moa stap na tu pasin bilong rispekim ol meri i no bin stap. i luk olsem olgeta man na meri i kamap ol birua tasol na i no gat ples bilong hait we ol meri na pikinini bai go long en.

Planti kain pasin no gut i bin kamap long ol pipel husat i stap long ailan Bogenvil insait long dispela taim, tasol ausait long PNG em ol pipel i stap na wok wankain tasol.

Em i bin olsem toktok o pasin i save kamap insait long ol haus man o haus tambaran we ol meri na pikinini bai i no ken save long wanem samting i kamap.


Olsem na em i gutpela long kain buk olsem i kamap na ol narapela lain bilong ausait na tu ol pikinini bilong Bogenvil long bihain taim inap long ritim na tingting gut long wanem kain hevi we ol pipel bilong Bogenvil, moa long en ol meri na ol pikinini na ol gutpela save-man bilong sios, gavman na developmen i bin kisim nating long tingting na laik bilong sampela liklik lain saveman tasol.

Mi ting em i naispela buk bilong wanpela histori bilong Papua Niugini na Bogenvil, olsem na gutpela yu tu mas baim wanpela na ritim.



Veronica Hatutasi wantaim senia ripota, na namba tu edita, Frieda Sila Kana. Poto: Nicky Bernard

**Prais bilong wanpela buk em K66.00**



# AMM Ketering bai amamasim ol lain long Bisini

**Nicky Bernard i raitim**  
WANPELA liklik ketering kampani bai amamasim ol manmeri na pikinini long Bisini taim ol go lukim ol pilai long Bisini pilai graun.  
AMM Ketering em bilong tupela mama husat i save stap long rot long Bisini na ol i save salim ol liklik kaikai long ol manmeri na pikinini husat i save raun long hap.  
Dispela liklik ketering bilong tupela i go bikipela na bikipela moa yet taim Pasifik Gems i bin kamap long Mosbi.

Misis Kesapai husat i wido na i gat tripela bikipela pikinini i statim dispela AMM Ketering long sait bilong haus bilong em long Bisini.

Planti manmeri na pikinini i save go baim kaikai long em olsem mumu, aigir na sampela moa kaikai em save salim long banis long haus bilong em.

Dispela ol kaikai bilong em i pulim ai bilong sampela bik manmeri na ol i save kam askim em long kukim kaikai taim ol i laik go long sampela bikipela bung long ol bikipela opis ol.



Nupela ketering stoa bilong Misis Kisapai bai redi long mun Mas long amamasim ol manmeri na pikinini taim ol go lukim pilai long Bisini pilai graun. Poto Nicky Bernard.

Misis Kisapai i no lukluk bek long dispela liklik ketering sevis em i save mekim nogat. Nau yet em i save wetim tasol ol oda bilong ol bikipela kampani na em save, kukim kaikai bilong ol long PNG stail stret.

Taim oda bilong mumu i kam, Misis Kisapai save i kirap long hap nait yet na redim olgeta samting bilong mumu. Em save wanem taim bai mumu i redi na wanem taim bai em i go lusim.

Misis Kasapai wantaim liklik grup bilong em i kisim wanpela liklik stoa haus na sanapim long sait bilong haus bilong em

long rot long Bisini.

Dispela liklik stoa haus em bilong ol kaikai na sof dring long helpim ol manmeri na pikinini husat i save go lukim pilai o pilai long Bisini. Sapos ol i hangere, ol i ken kisim gutpela kaikai long dispela liklik ketering stoa.

Misis Kasapai i tok dispela liklik ketering stoa bai op long mun Mas na ol bai kukim ol kankain kaikai bilong PNG stret. Sapos yu laikim kaikai long ol bikipela bung na painim bilong PNG stret, yu ken raun go long Bisini na sekim ol.




Misis Kisapai i sanap long sait bilong nupela ketering stoa bilong em long Bisini.






# Em nau! Ol pikinini i ken painim rot i go long ples wantaim Wantok kru...

Stat hia



Yu pinis! Em ples bilong yu



Ol wod lista:

- ANTAP
- ANIVESERI
- AIDIN
- BAGARAPIM
- IKNAIT

- BILUM
- DESEMBA
- DRAIRIP
- DISPELA
- HAMA
- HIDEN
- HAUS

- HANWAS
- IMIGRESEN
- ILEKSEN
- JENERETA
- JENERAL
- KAMAUT
- KALAPUA

- KENDIDET
- LAINIM
- LETABOKIS
- LUKLUK
- LIMBUM
- MAIMAI
- MALUMALU

T D R N R L F T Y B T D R I A E E P A O I V M S H  
 N O S A J E T M T V R M A E E R A G F D P I I H N  
 A J S S S I D P U C K Q S I Y A I B I K N A I T I  
 E A J F I I W T I X L G R K F J P E S I N N E E N  
 H E U R V I O R D T D E E A R E R D A N Y D H N P  
 I B E N M K S F J O S O T M E Y I L Q M I E E I E  
 D U P I U F R G I E N E C A Q E C R O D N S R T I  
 E E T H T W I C V E N T M U B T O T N Q K I Y A R  
 N E A X S A G I S E X E R T E O V E E E A I M T K  
 A F B E R B N E J E N E R A L V K A L R L I J U S  
 P I H A M A R J D E O P U E G S K I D T A I L S G  
 M S D L C G H K D X A L B T T N B C S M P K X Z N  
 E D I I I A A A D T A T V L R A N A M R U M U L S  
 S X O M N R U M N M U Z B G L N M U E L A A S E C  
 N P I B T A S A U W E Y A E C E L O C J G F A E K  
 Z S U U J P Z L M C A N P F D I T I O N Z P C C B  
 N C N M E I A P O D E S E M B A P E I S P X I E T  
 R B J G F M S F A G I T A V C E D A J V G I Z O N  
 R K B A T A X S E D N S T P S T T E F O I Z N G T  
 W F M A S M E T A A S R A L G R T E T I E D O E O

## STORI BILONG TUMBUNA

### Blekpawa man Tolema

**B**IPO bipo tru long ples Lawiri, insait long Pangia S. H. P wanpela man i stap.

Nem bilong em, Tolema. Em i wanpela man bilong kilim kapul. Wanpela taim em i wokabaut i go long bus long painim kapul. Em i kilim planti kapul na em i bihainim wara Polu i go. Arere long wara Polu, tupela man i stap. Nem bilong tupela em Temodo na Pudupo. Haus bilong tupela i stap insait tru long bus.

Long moning taim, Pudupo i stap long haus na Temodo i bihainim wara Polu i go antap na em i bungim Tolema na em i tok "wantok, yu raun long bus na kam na olsem, mi karim wanpela sugaken i kam na yu ken dring." Tolema i tok, orait mi ken dring.

Tupela, Temoda na Pudupo i no gat meri. Ol i tupela man bilong bus na deti i pulap long tupela. Pudupo em wanpela mangki man nai save trikim planti man.

Wanpela taim em i yusim blak pawa na mekim Tolema i ai slip. Pudupoo i bagarapim Tolema pinis long sugaken na Tolema i slip dai pinis.

Nau man ya i kisim kapul bilum hariap tasol na em i em rausim wanpela ston na i go insait long hul bilong ston.

Taim Tolema i opim ai na lukluk, kapul bilum i no stap, na man tu i no stap.

Tolema i wok long painim painim ya nogat tru na olsem, emi kirap i go long haus bilong em. Neks moning Tolema i kirap wokabaut i go long bus gen, we haus bilong tupela Pudupo wantaim Temodo i stap long en.

Em i spai i stap long haus baksait na harim stap. Pudupo i askim Temodo olsem brata yu save kilim kapul olsem wanem mi laik lukim ya.

Orait yu kam na mitupela bai i go na yu bai lukim. Olsem na tupela i wokabaut i go nau.

Orait nau, Tolema i harim olsem tupela man ya bai wokabaut na i kam long bus. Orait Tolema i hariap i go pas na kilim wanpela kapul.

Tolema i kalap i go insait long hul bilong diwai na em i mekim kapul i sindaun long maus bilong hul bilong diwai rot we tupela man bai wokabaut i kam long en.

Nau em i harim tupela brata ya i wokabaut i kam na Temodoi tok, hei bro yu tok long lukim kapul ya. Lukim kapul stap antap long diwai ya na mi bai go antap long diwai.

Yu wet i stap long as long diwai. Taim Temodo i go antap long diwai, kapul em i go insait long hul bilong diwai.

Tolema i putim han i kam antap pulim nek bilong Temodo na brukim nek em na em i dai.

Na Tolema i singaut long Pudupo olsem mi holim kapul pinis orait yu go katim wanpela stik na redi stap.

Amos Apai Baiyer Zoo  
WHP

Ansa bilong Wod Pilai isu 2161

NGEWFKEEISISEBLLSCOHAOOVO  
 VSPULSXEDELDRTKCCEGVSFES  
 IRDORRZNGJIRQSIPTCIRONPZV  
 SVSRKQPEFQXAQZTKHARIMGYRL  
 TTFKNATFIUOMCSLOGEXLEIROC  
 TYEPORBEKBBIHHEIOWIVANKALQ  
 JGZTCYAIUHAMBAKMANAECOCJD  
 EISPOKLOSTUGREDUETSMNLR  
 RAZRVTLTTEGAAAXDIKKCPAADXE  
 RHICXOOKSITMIGRESENZRFNNTC  
 ETHAEGNKASDLDMALTEAHRDEHO  
 HFLETAASRWVOAPYIPBWPOTINDP  
 PERALVINSEKKSOSPATIPXOKEGDM  
 HLDBRMMAMMTMPMGCAKMRNAELTE  
 DETENAHFSTAECGRSMAESMSOCY  
 BNZJSNEFTUBLGOGGTANPEARVRA  
 RHAEBVFEWPOAFDNEANGOANEEZF  
 BKPVREDKYEIAIEARERETTPAEXF  
 MSAERHRPBLCQOPLAPOLTEMEPE  
 VSRENSINIAUSTSSSRKNFSHEGX





# TOK PISIN NEWS

from Radio Australia  
radioaustralia.net.au

Harim TOK PISIN long  
Radio Australia  
**101.9FM**  
Port Moresby

**Tok Pisin Service**  
6am - 7am 6080; 7240(KHZ)  
7pm - 9pm 5995; 6020; 9710; 1280(KHZ)

## Australia Meri na ol Gel Ambaseda i go long Bogenvil



Australia Ambaseda bilong ol meri  
na ol Gel i raun long Bogenvil

### Sam Seke i raitim

**DEPUTI Spika bilong Atonomas Bogenvil Gavman, Francesca Semoso i tok tenkyu long Australia long dispela raun bilong Mis Stott Despoja long Bogenvil.**

Francesca Semoso i salim bikipela tok tenkyu long gavman na pipel bilong Australia long helpim ol i bin wok long givim AroB.

Long nau, gavman blong Australia i gat wanpela 14 miien n dola long 2014-2019

program wantaim ABG long sait long helpim ol meri.

Long Trinde em i bin lon-sim Bogenvil Women's Fed-eresen opis bilding long Buka.

Mis Despoja i bin bungim tu ol 4- pela meri insait long ABG palamen.

Na Francesca Semoso husat i memba makim ol meri long Not Bogenvil i tok ol meri lida ia ibin tokim Ms Despoja long go toksave long bikipela tengkyu long gavman blong Australia long olgeta help long olgeta yia.

## Draut na ren i bringim ol binatang nogut



Ol Westen Provins pipel i sanap lukluk long ol kaikai em ol binatang i bagarapim-Sally Lloyed i bin kisim dispela piksa

### Caroline Tiriman i raitim

OL dispela binatang i kaikai na bagarapim ol kumu na ol narapela kaikai olsem kaukau, banana, taro na tapioka.

Planti pipel long Papua New Guinea nau i bungim narapela hevi gen we draut na ren i kamapim, olsem ol binatang nau i wok long bagarapim ol nupela kaikai em ol pipel i wok long planim.

Ol dispela binatang i kaikaim na bagarapim ol kaikai olsem, kebis, kaukau, tapioka, banana, pumkin na ol kain kain kumu.

Papua New Guinea, Solomon Ailan na Vanuatu i bin kisim bikipela hevi long draut o biksan em El Nino i bin kamapim long 2015, tasol ol ren i wok long pundaun nau long dispela tripela kantri.

Planti fama long hailans rijon i planim ol kaukau, tasol ol i no karim gutpela kaikai.

Matthew Kanua, emi wanpela konsalten husat i wok long lukluk long draut wantaim Yunaitet Sios long PNG i tok dispela wari bai go het yet na planti pipel long ol ples longwe long ol taun bai hangere yet.

## Manus pipel i no laikim moa refuji



Asailam Ditensen senta bilong Australia long Manus

### Caroline Tiriman i raitim

SAMPELA asples pipel bilong Manus provins i askim strong Nesenenal Gavman bilong Papua New Guinea long noken putim ol nupela refuji long provins.

Ol lain bilong "Maus Manus Dvelopment Forum" i mekim dispela toktok taim Foren Afeas na Imigresen Minista, Rimbink Pato i tokaut olsem bai ol i putim planti ol refuji long komyuniti pastaim long pinis bilong 2016.

PNG Gavman i bin painim olsem planti long ol dispela

refuji em ol i stap long Australia Asailam ditensen senta long Manus em ol i refuji tru tru.

Tasol sampla lida i wok long tok olsem ol dispela refuji i wok long kamapim planti trabel long komyuniti.

Jenerel Seketeri bilong Maus Manus Dvelopment Forum, Ben Pokarup i tok ol kain trabel em ol refuji i wok long kamapim em olsem ol i save yusim ol asples pipel long salim ol sigaret bilong ol na tu, ol i save yusim hombru na raun wantaim ol yangpela meri Manus.

## Vanuatu epot hevi kamapim wari: Leba Komisina i tok

### Caroline Tiriman i raitim

KOMISINA bilong Leba i tok em i wari long ol wokman-meri long kantri we i bungim hevi nau bihainim tingting bilong Air New Zealand na Virgin Australia long stopim ol ran bilong balus bilong ol i go i kam long Vanuatu.

Komisina bilong Leba bilong Vanuatu i tok em i wari long ol wokman-meri bilong em ol i bungim hevi nau long kantri bihainim tingting bilong Air New Zealand na Virgin Australia long stopim ol flight o ran bilong balus bilong ol i go i kam long Vanuatu.

Lionel Kaluat i mekim dispela toktok taim ol Hotel industri na ol narapela wok turisam i rausim pastaim ol wok manmeri bilong ol long wanem i no gat planti turis i wok long go raun long Vanuatu.

Dispela tupela balus kampani i bin stopim ol sevis bilong ol i go long Bauerfield Intanesenel Epot long Port

Vila long wanem ol i tok dispela epot i no fit long kisim ol balus.

Nau i luk olsem ol lain bilong Wol Benk nau i redi long helpim Vanuatu i stretim dispela hevi.


Dispela hevi i kamapim bikipela wari nau long turisim indastri na ol turis bisnis wantaim tu ol wokus i laikim bai kantri i mas stretim kwik dispela wari na apim wok turisim gen.

Ol i no save wanem taim tru bai dispela tupe balus kampani bai stat long ran i go bek long Vanuatu, tasol ol balus bilong Air Vanuatu i save go het yet long flai i go na i kam long kantri.

Wol Benk nau i redi long helpim Vanuatu i stretim dispela ples balus..Ol senia gavman opisa bilong Vanuatu i bin holim miting wantaim Wol Benk long Port Vila long toktok long ol rot em bai ol i bihainim long dispela projek.

Wol Benk bai tromeim 59 milien dola long dispela wok.

## Sik lepra i gen long Solomon Ailan



Solomon Ailan i skulim ol pipel long was long sik lepra

### Sam Seke i raitim

DISPELA sik lepra em i kam bek gen long Solomon Ailan bihain long em i bin pinis long 1995.

Stat long 1995 i kam inap nau, moa long 300 lepra keis i wok long kamap nau long Solomon Ailan.

Nesenel Leprosi Edvoketa long Ministri blong Helt, Oliver

Merpirla i tok long 2014 ol lukim 48 keis, na long 2015 ol i rekodim 31 keis.

Mista Merpirla i tok sik i wok long stap long "incubator period" tasol em i no kamaut long planti yia.

Mista Merpirla i tok dispela sik lepra em i kam bek moa bihain olgeta i lukim olsem em i pinis nau long Solomon Ailan.

## Nupela Prais Minista



Prais Minista Charlot Salwai bilong Vanuatu

### Sam Seke i raitim

Vanuatu palamen i votim memba bilong Pentecost, Charlot Salwai long kamap praim minista Em i kisim bikipela vot bilong ol memba bilong palamen insait long sekret balot vot.

46 long ol 52 memba bilong Vanuatu palamen i bin votim Mista Salwai long 6

pela vot olgeta. Tupela husat i nominetim em ol i foma praim minista, Joe Natuman an Ham Lini.

Ol i votim ol nupela memba i go insait long Vanuatu Palamen long Janueri 22.

Ol i votim tu Esmon Sae, Memba bilong Malekula olsem nupela Spika bilong Palamen.



# Pop Fransis egensim ol Meksiko drag tred dila

**HETMAN bilong Katolik Sios long wol, Pope Francis i tok egensim stret ol lain i save baim na salim ol drag o spak-brus long kantri Meksiko long Saut Amerika, na kolim ol olsem "ol dila bilong kamapim dai".**

Em i tok strong long ol pipel bilong Meksiko long daunim laik bilong mani bikos dispela em i pasin bilong devil.

Em i wokim dispela toktok insait long wanpela bikpela misa lotu ol i bin mekim ausait long Meksiko siti long las wik Sande. Moa long 300,000 tausen pipel i bin stap long en. Dispela siti i save lukim planti vailens pasin bikos long ol spakbrus samting.

"I mas go long het bilong yumi olsem wantaim devil, i no gat toktok," Pop Francis i bin tok long dispela bikpela bung insait long 5-pela de raun bilong em i go long Meksiko.

Long namba tu de, Pope i bin raun i go long Ecatepec, wanpela sabeb long Meksiko siti we planti tarangu lain i stap long en, mak long 6 milien pipel.

Long dispela sabeb tu, ol kain pasin olsem drag vailens, kidneping, gang stail kilim dai narapela man na moa yet, long ol meri i save kamap.

Pope i bin autim mesej long strongim ol pipel long dispels ples.

Wanpela man bilong dispela ples, Ignacia Godinez, i gat 56 krismas i tok Pope Francis i go long Ecatepec long wanem, ol i laikim em long hap bikos ol pasin bilong kilim dai man, kidnep na drag i go bikpela na go bilong Pop i givim ol gutpela tingting.

"Mesejo toktok bilong em bai go aut na ol lain i laikim long harim. Ol gutpela pipel bai kisim na daunim ol no gut lain," MIsta Gordinez i tok.

Long fainel prea bilong em, Pope Francis i bin askim strong ol pipel bilong Meksiko long mekim kantri bilong i ples bilong painim gutpela sans, we bai no gat nid long lusim ples na go long narapela kantri long inapim driman, no gat nid long ol narapela i mekim ol nogut o ol wokboi long stap laip, na lukautim famili bilong ol, no ken kamap ol tarangu long han bilong liklik lain, na ples we bai haus kra i stap olgeta taim bikos laip bilong ol man, meri, yangpela pipel na ol liklik mangki i bagarap bikos long han bilong ol "dila bilong dai," Pope Francis i tok.

Ol pipel i bin sanap lainim motokeid bilong Pop taim em i laik go long bikpela fil long mekim lotu. Ol i tro-moim ol flawa na han wantaim ol liklik plak ol i

wokim long ol kala bilong Vatiken plak.

Ol strit sela i salim ol tisiot, ol plet we i gat piksa bilong Pop Francis long ol, ol pin, ol bandana na ol kataut long ol kadbob wantaim piksa bilong pop.

Samting olsem 100,000 pipel em ol i kilim ol dai pinis na 27,000 i lus long han bilong ol drag lain stat yet long 2006 taim pastaim praim minista i bin putim woa egensim ol bikman bilong ol drag dila long Meksiko."

Samting olsem 1,500 meri i lus pinis long Meksiko Stet stat yet long yia 2005 na long las yia, gavman i bin putim tok lukaut long kilim ol meri long Ecatepec na tu, olgeta hap bilong Meksiko.

Tasol ol meri husat i bin kam long lukim Pop Francis i tok ol i bin pilim seif bikos gavman i bin putim 10,000 polis long lukautim ples na sekjurit bilong Pop taim em i mekim raun long kantri.

Bipo em i go, Pop Francis i bin go raun lukim ol siklain na pre long ol na blesim ol. Planti pipel long Meksiko em ol Katolik i bin amamas long wokabaut bilong Pop Francis i go long hap na ol i bilip olsem bai ol i lukim sam-pela gutpela senis i kamap.

# Zika binatang i go bikpela US Olimpik Komiti i no inap stopim ol etlit i go pilai long Brasil



OL federal helt atoriti long Amerika i wok long glasim na skelim ol hevi we ol pilaia long 2017 Olimpik Gem long Rio, Brasil i ken bungim long Zika Vairas o binatang.

Brasil i wanpela long ol kantri long Amerika we Zika binatang i kamapim sikna hevi long en long dispel taim i go bikpela.

Ol opisal bilong US Olimpik Komiti i tok ol i no helt lain na olsem ol i no inap long stopim

ol Olimpik pilaia long no ken go long pilai. Tasol ol pilaia i ken harim gut ol edvais bilong U.S. Senta long Disis Kontrol na Privensen.

Dokta Anthony Fauci, em bos bilong Nesanel Institut bilong Allergy na ol Infekses Disis, i tok em i hat long givim edvais i go long ol lain husat i tren long planti yia long stap insait long bikpela Olimpik Gem, tasol ol i ken givim ol feks na ripot long gaidim ol pilaia.

Em i tok Zika infksen i no bikpela samting, tasol em i no gutpela long ol meri i gat bel bikos sapos moskito i kaikai ol na ol i kisim Zika vairas, ol bai karim bebi wantaim hevi na dispela em long bebi i gat liklik het long ol na bai tingting bilong ol bai no kamap gut.

Sampela kantri nau i wok long edvaisim ol etlit bilong ol long sik Zika bipo long 2017 Olimpik Gems.

## Plen long nupela yuniti gavman bilong Libya

OL DELEGET bilong ol birua grup long Libya i bin bung long las Sande na wok long plen bilong nupela yuniti gavman bihainim wok midiesen bilong Yunaitet Nesen.

Sapos gavman bilong Libya we i gat luksave long en long intenesenel level i tok oraitim dispela nupela yuniti gavman, em inap long askim ol intanesenel komyuniti long salim ami i go long kantri long pait egensim ol Islamik Stets (IS) teroris

husat i strongim wok bilong ol long dispela kantri taim i no gat gutpela gavman long ranim kantri.

Yuniti kaunsil i bin kama-pim plen insait long bung bilong ol long Skhirat siti long kantri Morocco.

I gat pret olsem sapos ol i no stretim kantri, bai Yurop i karim moa hevi taim ol re-fiji i ranawe lusim kantri na go long ol kantri long Yurop. Libya i stap klostu long ol ailan bilong Itali.

# Albert Einstein i bin tok tru: Ol saientis i painim ol gravitesen weiv

Sapos Albert Einstein, biknem saientis long wol tude i stap laip, em inap tok, "mi tokim yupela pinis."

Long saiens wol tude, bikpela samting i kamap na dispela em long ol i luksave na painim "gravitational waves" o ol muvmen long spes na taim i stap tru tru, we i soim olsem saientis Einstein i bin tok tru 100 krismas i go pinis taim em i tok ol dispela samting i tru na ol i stap.

David Reitze eksekutiv Dairekta bilong LIGO em Advanced Laser Interferometer Gravitational-

Wave Observatory, i tok dispela nupela painim em i bikpela rekot long saiens komyuniti long wol na i min olsem dispela i opim nupela dua long ol saientis long lukim na harim ol samting i kamap long spes we bipo em i no gat.

Em i tok Einstein tu i bin bilip olsem em i hat long man i lukim na harim ol samting long Spes, maski, tru tru ol i stap.

"I kam inap nau, yumi yau pas long spes, tasol nau long namba wan taim, yumi ken harim ol weiv o saun taim ol samting long

spes i muv o pundaun, "Reitze i tok.


Ol samting i kamapim, ol gravitation wave em taim tupela blekpela hul (long spes) i paitim wanpela narapela (collide) na bilip i stap olsem dispela bai kamapim ol weiv (olsem ol muvmen long wara) long spes na taim ol i kolim long gravitational wave. Bikos gravitesen fos i no strong, Einstein i bin tok em bai hat long man i harim taim ol i kamap na go pas long pipel na ol samting long graun.

Einstein i bin tok taim wanpela samting i muv long

yunives o spes, em bai kamapim ol weiv olsem tasol dispela i kamap long wara taim yu tromoim stori.

Ol dispela weiv em samting we ol saientis i painim tude na dispela i mekim na ol i ken harim ol samting i kamap long yunives o spes.

Painim ol dispela weiv i bikpela samting long saientifik komyuniti long wol bikos dispela i givim ol sans long opim nupela rot long lukim na harim yunives, na larim ol astronoma long painim na lukim ol samting long spes we yumi no bin save olsem ol i stap.



Albert Einstein



## Kirapim rot long ples, kirapim egrikalsa



Oposisen Lida Don Polye

**GAVMAN mas kirapim nupela rot na stretim ol olupela rot long ol ples we sans bilong kirapim ol egrikalsa projek em i bikpela tru.**

Oposisen Lida Don Polye i tok planti manmeri PNG i save stap long ples na laip bilong ol manmeri i stap long egrikalsa.

Mista Polye i tok sapos gavman i kirapim ol nupela rot o stretim gen ol olupela rot long wan wan distrik, dispela bai helpim ol manmeri long yusim rot sevis long planim ol kaikai na salim long maket.

Mista Polye, husat i Memba bilong Kandep, i no wanbel long gavman i wok long kirapim o stretim ol rot na bris insait long siti olsem Pot Mosbi, Lae, Mt Hagen na Kokopo tasol.

"Gavman i mas kirapim nupela rot long ol ples. Mi no wanbel long gavman i wok long yusim long kirapim ol rot long siti tasol," Mista Polye i tok.

Em i tok ol manmeri long ples i mas gat gupela rot na bris, gutpla sip bris, pawa saplai, haus sik na skul.

"Gupela rot em i wanpela ki samting long kirapim

egrikalsa invesmen na bisnis. Ol manmeri mas gat gupela maket. Maket em i wanpela ki samting tu.

"Pawa saplai i mas ran gut. Haus sik i mas stap. Ol didiman o egrikalsa opis tu i mass tap long ples wantaim ol manmeri long givim ol skul toktok na helpim ol manmeri," Mista Polye i tok.

Em i tok gavman i mas opim ol ikonmik korido olsem Sepik Plein, Markham Veli, Waghi Veli na Karamui.

Em i tok ol dispela ples i gat bikpela sans long kirapim egrikalsa bisnis.

"Sapos gavman i lukluk long ol dispela ples na kirapim ol sevis, ol manmeri bai ken yusim gupela graun long dispela ol ples long planim ol kaikai.

"Gavman i mas kisim i kam insait ol investa long egrikalsa. Ol dispela ples mi kolim, i gat gupela graun inap long planim ol kaikai.

"Em i moa beta sapos gavman i planim ol kaikai na lukautim ol enimal long fam. Dispela bai givim sans long planti manmeri long ples long kisim wok na sapotim famili na i stap gut long ples," Mista Polye i tok.

Em i tok PNG i gat gupela graun long planim ol prut olsem painepal, orens, muli, lemon, mengo, watomelon na ol arapela prut.

"Yumi gat gupela graun. Graun bilong PNG i no save nidim fetilaisa. Gavman i mas sapotim ol manmeri long planim ol kainkain prut.

"Yumi ken salim ol dispela prut long PNG yet na sampela salim i go aut long ovasis maket," Mista Polye.

Em i tok PNG gat bikpela graun long lukautim ol enimal olsem pik, kau, sipsip, goat, na kakaruk.

"Ol manmeri i nidim trening, mani na gavman sapot. Gavman i mas sapotim ol wantaim ol sevis olsem rot. Egrikalsa na pasin bilong mekim gaden na lukautim ol enimal em i stap pinis long blut bilong ol manmeri bilong yumi."

Mista Polye i tok egrikalsa tasol i ken kirapim na strongim ikonmik bilong PNG.

"PNG i gat bikpela sans long yusim graun na kirapim planti fam na plantesen. Dispela i ken sapotim ikonmik bilong yumi," Mista Polye i tok.

## Kitogara bai senisim Koki

TAIM planti ol kampani long PNG i bungim hevi long foren risev na sot long mani, wanpela kampani i no kisim taim.

Kitogara Limited em i wanpela kampani bilong PNG na em i bin stat mekim bisnis long PNG long yia 2012.

Kitogara bai nau kirapim wanpela bikpela haus long Koki long Pot Mosbi. Nem bilong dispela haus em i Koki Bay Plaza na ol bai kirapim dispela long mani mak K60 milien.

Dispela graun long Koki Bay i save stap olsem wan-

pela liklik fil bilong pilai ragbi na ol arapela gem.

Tasol Kitogara bai kirapim dispela bikpela haus na dispela fil bilong pilai bai no moa i stap.

Opresen Menesa bilong Kitogara Daniel Hii i tok dispela nupela Koki Bay Plaza bai gat 20 liklik haus na opis long givim sans long ol manmeri PNG i statim ol liklik bisnis.

Em i tok projek bai stat long mun Epril dispela yia na pinis long 2017.

Mista Hii i tok Kitogara i wok long kirapim sampela

moa projek long PNG. Dispela ol projek em iol Waigani Viles Apatmen, Rainbo Haits Hausing Estet na Waigani Viles stes namba 2 projek.

Dispela olgeta projek i stap long Pot Mosbi.

Em i tok Kitogara i pinisim sampela ol bikpela projek long Australia na Malaysia tu.

"Mipela i laik kirapim ol gupela haus na bilding long larim ol manmeri i PNG i yusim ol dispela haus long slip gut na mekim bisnis gut," Mista Hii i tok.

## Papagraun stopim protes

OLGETA mani i kam long PNG LNG Projek we ol papagraun inap long kisim i stap gut tru na nogat wanpela man bai stilim.

Dispela em i toktok bilong Praim Minista Peter O'Neill. Mista O'Neill i bin mekim dispela toktok taim em i bin go lukluk raun long Hela Provins las yia.

Long mun Januari long dispela yia, Mista O'Neill i mekim gen wankain toktok olsem no gat wanpela man bai stilim mani bilong ol papagraun bilong wanwan projek eria bilong PNG LNG Projek.

Tasol ol papagraun long Hides long Hela Provins i bin tingting long kirapim wanpela protes las wik.

Ol papagraun bilong Hides PDL 1 na PDL 7 i bin tingting long kirapim dispela protes.

Dispela protes i bin stop taim ol i kisim gupela toktok long nesanel gavman na Hela provinsal gavman. Ol mausman bilong papagraun i tok ol i bin tingting long kirapim dispela protes bikos ol i no kisim benefit mani bilong PNG LNG Projek.

"Mipela i no bin kisim ol royalti mani. Gavman i tok dispela mani i stap long Sentral Benk tasol mipela i no save sapos em i tru o no gat," wanpela papagraun i tok.

"Mipela i harim ol ol pablik sevan i no kisim potnait mani bilong ol na no gut mani bilong mipela tu i lus long benk," em i tok.

Tasol Sentral Benk Gavana, Loi Bakani, i bin tok benk i holim ol royalti mani tasol long wanpela tras akaun.

Ol papagraun bilong Angore PDL 8 i les long protes o mekim sampela no gut samting. Ol i tok ol i redi long yusim sans bilong PNG LNG Projek na mekim bisnis na kirapim ples bilong ol.

Siaman bilong bilong Imika klen, Hari Elija Timba, i tok ol papagraun bilong Angore i wanbel na hamamas stret long Nesanel Kot

Jas, Jastis Ambeng Kandakasi, i mekim gupela wok long sekim na glasim gut ol papagraun tru bilong projek eria.

Planti papagraun tru i bin stap na dispela i bin mekim hat long gavman i givim sampela ol MoA fan, sid kapital o bisnis developmen gren (BDG) na IDG fan mani.

"Jastis Kandakasi i bin kamapim gut dispela ADR. Em i painimaut pinis ol tru tru papagraun bilong Angore. Mipela i tru tru papagraun bilong Angore aninit long ADR i stap redi tasol long kisim ol royalti mani na statim ol bisnis we pipel bai kisim benefit," Hari Timba i tok.

Mista Timba i tok sapos dispela ADR i no bin painimaut ol tru tru papagraun long Angore, dispela inap long skruim taim i go moa yet na ol pipel inap long lusim sans bilong ol long kisim ol gupela samting i kam long dispela ges projek.

"Mi amamas tru long gavman i mekim dispela gupela wok na mipela ol papa tru tru bilong ol welhet na Angore manmeri i nau redi tasol long skelim ol benefit we LNG bai bringim i kam long ol pipel long ples.

"Mipela i laik kirapim ples na helpim ol pipel. Pastaim bikpela pait i bin kamap long ples na nau olgeta manmeri i les long trabel na ol i laik senisim laip. Mipela i tok tenkyu long Jastis Kandakasi i mekim gut dispela wok long helpim mipela," Mista Timba i tok.

ADR wok painimaut we Jastis Kandakasi i bin bosim i bin glasim gut tru ol lenona klen na ol i painimaut pinis 47 lenona klen o papagraun grup.

"Ol Angore papagraun i nau redi tasol long kisim K12 milien bisnis developmen gren (BDG) o sid kapital long kirapim nupela bisnis," Mista Timba i tok.

Dispela K12 milien bilong Angore i stap long wanpela tras akaun long Sentral Benk.



**MANILA**  
**k1,708\***  
RETURN

Call toll free 180 3444 for more information.

**Air Niugini**    
www.airniugini.com.pg 

\*Ex Port Moresby. Conditions Apply.



# Basil: Gavman mas helpim kakaruk bisnis

DEPUTI Oposisen Lida Sam Basil i singaut gen long gavman i lukluk long ol baio-sekyuriti samting long sapotim ol lokal egrikalsa na laipstok industri bilong PNG.

Mista Basil i mekim dispela toktok bihain long gavman i opim dua long larim PNG i baim ol kakaruk bilong salim long stua long ol arapela kantri.

Minista bilong Egrikalsa, Asik Tommy Tomscoll, i bin stopim ol kampani na bisnis haus long PNG long baim na kisim ol kakaruk bilong arapela kantri i kam insait long PNG.

Mista Basil i tok sapos gavman putim moa mani na lukautim gut dispela tupela industri, ol manmeri bilong dispela kantri bai lukim level bilong poveti o tarangu pasin i go daun, gutpela kaikai bilong lukautim bodi i kamap, sekyuriti bilong kaikai i stap gut, moa wok mani bai kirap na bai kamapim kompetisen wantaim ol kaikai yumi save kisim i kam insait long narapela ol kantri i stap ovasis.

Mista Basil, husat i Membra bilong Bulolo, i tok taim gavman i opim dua bilong larim PNG i baim ol kakaruk long arapela kantri olsem Australia, Nu Silan, Saina, Indonesia, Thailand, Malaysia, Vietnam na Pilipins, dispela bai kamapim kompetisen na larim ol manmeri i baim ol kakaruk long liklik mani.

“Gut nius bilong dispela em olsem ol manmeri husat i no save wok o husat i save kisim liklik mani bai gat sans long baim kakaruk long liklik mani mak olsem K6 o K8,” Mista Basil i tok.

Taim Minista Tomscoll i bin stopim ol kakaruk saplai bilong narapela ol kantri i kam insait long PNG, ol local manmeri na kampani husat i save lukautim ol kakaruk na salim i bin apim mak bilong prodaksen na mekim gut mani.

Tasol taim Minista Tomscoll i opim dua bilong kisim ol kakaruk long ausait kantri i kam, ol lokal kampani bilong lukautim na salim kakaruk olsem Zenag Chicken, Niugini Tablebirds na arapela ol liklik bisnis manmeri i no mekim gut bikipela winmani bikos kompetisen i kamap.

“Ol liklik manmeri long ples husat i save lukautim kakaruk long salim na kisim mani bai no moa mekim gut bikipela mani bikos moa kakaruk mit na kiau bai kam insait long PNG.

“Dispela bai daunim mani mak ol manmeri bilong yumi i save kisim na tu ol sampela manmeri bai lusim wok taim kampani i mekim los,” Mista Basil i tok.

Nesenel Gavman mas mekim sampela samting long larim ol lokal kampani na bisnis haus bilong lukautim kakaruk i no ken lusim mani taim dispela kompetisen i kamap.

“Gavman i no ken opim rot long larim ol kakaruk na kiau bilong narapela kantri i kam insait. Em i mas tingim poltri industri bilong kantri na ol manmeri husat i save wok long dispela industri.

“Kompetisen bai nau kamap bikipela tru. Na i luk olsem planti ol liklik manmeri long ples husat i save wok long poltri industri bai lusim wok bikos industri bai no inap mekim bikipela winmani.

“Ol manmeri husat i save lukautim kakaruk na salim long kisim mani na lukautim famili bai kisim hat taim tu. Ol bai no inap kisim moa mani bikos kompetisen bai daunim prais bilong kakaruk,” Mista Basil i tok.

Wankain olsem gavman i opim rot bilong moa kakaruk saplai long kam insait long kantri, Mista Basil i tok gavman i mas daunim mani mak bilong takis em i save kisim long ol masin na marasin bilong yusim long kakaruk fam olsem ol trakta masin, kaikai bilong kakaruk, marasin bilong kakaruk, ol samting bilong kirapim haus bilong kakaruk na sampela samting poltri industri long PNG i save nidim.

“Sapos sampela kampani i laik mekim fektori bilong stokfid o kaikai bilong kakaruk, gavman i mas sapotim ol. Takis mani o tarif i mas go daun.

“Dispela bai mekim prais bilong ol kaikai bilong kakaruk i go daun. Taim prais bilong stokfid o kaikai bilong kakaruk i go daun, prais bilong kakaruk tu bai go daun na lokal manmeri husat i save lukautim kakaruk bai stap gut.

## Wok long P'nyang wok long go het

PLANTI wok i go het yet long nupela P'nyang gas fil long Westen Provins, ExxonMobil i tok.

Wanpela mausman bilong ExxonMobil PNG i tok ExxonMobil i wok long mekim planti ol wok long painim ges na bihain long dispela ol bai mekim desisen long olsem wanem ol bai kirapim dispela bikipela ges fil.

“I gat planti ol wok i stap long mekim. Bihain long dispela ExxonMobil bai mekim desisen long olsem wanem ol konstraksen wok bai kamap long kirapim dispela ges fil,” em i tok.

Em i tok ExxonMobil i wok long wokbung wantaim gavman long stretim ol samting long larim P'nyang projek i kisim Petroleum Developmen Laisens (PDL).

“Mipela i wok long putim moa mani long mekim ol drilling wok long sekim hamas ges i stap aninit long graun,” em i tok.

P'nyang i ken kamapim namba 3 tren long PNG LNG Projek. Tasol ol papagraun i laikim ExxonMobil na gavman long kirapim dispela ges projek bilong em yet.

Ol i les long P'nyang i kamap olsem

wanpela liklik projek bilong PNG LNG Projek.

Tasol gavman, Oil Search na ExxonMobil i sainim pinis wanpela agrimen long larim P'nyang i kamap wanpela apstrim ges fil long pulim ges kam olgeta long PNG LNG Plent sait ausait long Pot Mosbi na kamapim namba 3 tren bilong LNG Projek.

“Mipela bai drilim Muruk wel klostu long Juha na drilim e P'nyang fil long Westen Provins. Dispela tupela fil i gat sans long kamautim moa ges long kisim ges bilong kirapim ges kamapim pawa na tu bilong mekim PNG LNG Projek i kamap bikipela.”

P'nyang projek em i wanpela bikipela milien dola projek na em bai kirapim sans bilong wok mani na gavman bai kisim bikipela mani long dispela projek tu.

“Mipela i wok long wokbung wantaim ol papagraun na gavman long kirapim dispela projek hariap. Mipela i laik kisim PDL laisens na paipain laisens. Ges mipela i kisim long P'nyang bai kirapim K50 megawat pawa saplai long sapotim PNG Power,” em i tok.

# Japan bai helpim PNG Power

**GAVMAN bilong Japan bai givim K200 milien long PNG Power Limited (PPL) long kamapim pawa lain na ol trensmisen samting bilong Ramu haidro pawa projek.**

Gavman bilong PNG na PPL i nidim K250 milien long kirapim dispela projek. K200 milien i kam long gavman bilong Japan i karamapim 80 pesen bilong total mani mak PPL na PNG gavman i nidim.

Gavman bilong PNG bai painim K50 milien long kamapim dispela projek. Pawa saplai i kam long Ramu i save saplaim pawa i go long Morobe, Madang na 5-pela Hailans provins bilong Isten Hailans, Simbu, Jiwaka, Westen Hailans, Enga na Sauten Hailans.

Hela i no save kisim pawa long Ramu. Em i bin stap long bikipela tudak tasol ExxonMobil na Oil Search i tok long putim pawa saplai long Hela.

Stratejik Infrastraksa Planning Menesa bilong PPL,

Francis Uratun, i tok dispela projek bilong strongim pawa saplai na developim long Ramu na long ol arapela haidro pawa stesin long PNG em i wanpela ki developmen we PPL i bihainim long Visin 2050.

Aninit long Visin 2030, Nesenel Gavman i laik lukim 70 pesen bilong ol manmeri i stap long ples i gat gutpela pawa saplai na lait i stap long wan wan ples na komyuniti long yia 2030.

PPL i lukluk long kamapim 400 na 500 megawat pawa saplai long dispela Ramu grid long saplaim pawa i go long Hailans, Morobe na Madang we planti risos developmen i wok long kamap.

Mista Uratun i tok ikononi bilong PNG long dispela ol provins i wok long gro na dispela i nidim pawa saplai long helpim planti bisnis na developmen long kirapim.

Mista Uratun i mekim dis-

pela toktok long Lae las wik taim em i bung wantim ol Embesada bilong Japan, Morio Matsumoto na Sif Mausman bilong JICA, Shigeru Sugiyama.

Tupela bikman bilong Japan i bin go long Lae long Lae, Morobe Provins long skelim sampela ol bikipela infrastraksa projek gavman bilong Japan i bin fandim.

Mista Uratun i tok pawa saplai i kam long Ramu grid bai sapotim Kurumbukari main long Madang na Wafi-Golpu gol projek.

Em i tok Wafi-Golpu main projek tasol bai nidim 100 megawat pawa saplai. Tasol nau yet Ramu i save kamapim 89 megawat pawa saplai.

Wanpela kampani bilong Japan, NEWJEC Inc, bai mekim masta plen bilong kirapim dispela Ramu pawa projek.

“PPL i amamas long sapotim gavman bilong Japan i givim,” em i tok.

# India laik inves na kirapim bisnis hia

WANPELA bisnis delegesen bilong India i kam long PNG long Sande long lukluk raun long sans bilong mekim bisnis long dispela kantri.

Dispela raun bilong ol bisnis manmeri bilong India i soim olsem ol i gat bilip long ikononi bilong PNG na politikel stabiliti o ol wok long politik i go gut we gavman i kamapim.

Long dispela as, 11-pela manmeri husat i makim maus bilong Konfederesen ov Indian Industri (CII) i kam raun long PNG long painim ol rot na sans bilong inves na mekim bisnis long hia.

Long mun Janueri, wanpela bikipela grup bilong ol bisnis manmeri bilong Saina i stap long Pilipins i bin kam raun long painim sans bisnis long hia.

Ol memba bilong CII i makim praivet na pablik sekta industri o bisnis na ol kampani long India. Wanpela as bilong raun bilong ol em long painim ol bisnis manmeri long PNG na kamapim bisnis patnasip.

Menesing Dairekta bilong Invesmen Promosen Atoriti (IPA), Ivan Pomelau, i tok ol invesmen bilong India i wok long gro long PNG.

Mista Pomalau i tok dispela lukluk raun bilong CII bai kirapim planti nupela sans bilong groim bisnis na invesmen namel long India na PNG.

CII em i bikipela bisnis ogenesisen bilong India na em i lukautim moa long 8, 000 memba i kam long praivet na pablik sekta ogenesisen. Moa long em, CII i gat 200, 000 kampani memba long 240 nesenel na rijonal sekta industri.

CII i save wok bung wantaim gavman bilong India long kirapim ol polisi, toktok wantaim ol lida na kamapim bisnis patnasip wantaim ol bisnis manmeri na kamapim long arapela kantri.

CII i tok dispela raun bilong ol i kam long PNG bai strongim bisnis patnasip na poroman namel long India na PNG.

Ol dispela bisnis manmeri i laik kirapim bisnis long sait bilong Solar Eneji, haus sik

bisnis, turisim bisnis, petroleum na ges, fud prosesis na egrikalsa.

IPA na ol arapela gavman dipatmen olsem Dipatmen ov Foren Afes, Dipatmen ov Tred, Komes na Industri na Indian Hai Komisni i wok long helpim i wok long helpim ol dispela bisnis manmeri long stretim ol samting na statim bisnis long PNG.

Long Mande dispela wik, dispela delegesen bilong CII i bin lukim na harim ol presentesen bilong IPA, Benk ov PNG, Intanal Reveniu Komisni (IRC) na PNG Customs Sevis.

Ol dispela gavman ogenesen i bin autim ol toktok long mekim bisnis long PNG taim PNG Semba ov Komes na Industri i toktok long ol samting bilong kirapim bisnis long PNG.

Ol i bin go lukluk raun long Pot Mosbi Jeneral Haus Sik, klinik na long Loloata Ailan Risot na Motupore ailan ausait long Pot Mosbi.

Invesmen bilong India i bin gro isi isi tasol nau em i wok long gro hariap tru.



# MV WYWAM PNG

## i kamap pinis long Galp

### Frieda Sila Kana i raitim

**MV YWAM PNG i kamap pinis long Galp Provins long Sande bihain long em i lusim Pot Mosbi basis long Sarere moning taim.**

Ol volantia helt kru i statim wok bilong sekim ol siklain pinis long Mande.

Long taim bilong opim nupela klinik na operesen fasiliti bilong ai na tit antap long sip, PNG Minista bilong Nesenel Plening na Monitaring i bin stap na tu Australia Federal Minista bilong Intenesenel Developmen na Pasi-fik, Steven Ciobo.

Mista Ciobo i tok em i amamas long makim ol pipel bilong Australia husat i save tromoi takis bilong ol long gavman bai helpim ol dispela kain gutpela wok we ol narapela man meri bilong Australia i save mekim.

Em i tok, tingting bilong AusAID em i bilong senisim laip.

Mista Ciobo i tok em i no nupela long YWAM bikos sista bilong em i bin wanpela volantia long YWAM taim em i bin gat 21 krismas, we em i bin wok long Amsterdam na long Mumbai long India inap long 12-pela yia.

“Long Australia Eid program mipela i wok long lusim olpela we bilong givim ol gren mani long ol gavman na em i wok long go wantaim ol kain gutpela wok marimari olsem YWAM Medikol Sip. Wankain olsem mipela i givim mani long PNG Kriket tim tu.

“Mi amamas long wokabaut insait long sip tunait wantaim Sarah na lukim yupela ol 100 volantia long givim taim bilong yupela yet long wok volantia olsem. Na tu long yupela ol lain husat i givim mani bilong yupela na ol narapela lain husa t i mekim wok long as ples wantaim wankain bel bilong mekim gutpela wok, mi tok tenkyu.” Mista Ciobo i tok.

Australia i putim AUD\$2 milien long helpim YWAM Sip long senisim ol samting antap long sip long kamapim tupela klinik sejeri antap long sip. Olsem na long dispela we Australia i gat han long mekim senis long ol ples i stap longwe long ol sevis insait long wol, moa long Pasifik na PNG.

Bikpela samting em kepesiti biling o long trenim ol helt wokman na meri long graun we Dokta Sarah na ol medikal tim i go long en. Dispela bai skruim wok bilong helt sevis i go yet taim sip i lusim na i go long wei bilong helpim ol helt woka na long gavman helt sistem.

Mista Ciobo i makim maus bilong ol lain bilong baim takis long Australia wantaim Australia gavman long tok tenkyu long Dairekta bilong Sip, Ken Mulligan long lidasip bilong em.

Long wankain taim, Minista bilong Nesenel Plening na Monitaring, i tok vidio we ol i bin soim antap long sip em i soim wanem kain hevi ol pipel bilong PNG long rurel eria i save bungim olgeta de.

“Ol kain stori olsem bilong dispela meri long piksa we em i bin lukim ol pikinini bilong em long namba wan taim, em i soim wanem kain hevi ol pipel bilong mipela i save bungim long olgeta de,” Mista Abel i tok.

“Mi amamas long kain lain olsem yupela we i save long kamapim kain kain stail bilong mekim gutpela wok. Na mi gat bikpela amamas olsem gavman bilong PNG i gat sans long patna wantaim ol kain lain olsem yupela.”

Mista Abel i tok, bikos gavman i no gat mani long mekim olgeta sevis long ol rurel ples, em i gutpela sans long wok wantaim ol kain ogenesesen olsem YWAM.

“Mipela i gat bikpela baset tru nau gavman i no gat mani long mekim olgeta wok olsem helt sevis. Olsem na mipela long Nesenel Plening i laik wok patna wantaim ol arapela gutpela ogenesesen olsem yupela long YWAM Medikol tim long kam insait na helpim ol pipel bilong mipela long helt sevis,” Mista Abel i tok.

MV YWAM PNG em i olsem wanpela lait i sain we i wok long kisim ol nupela moa patna i kam antap long wok bilong sip.

“Wantaim nupela dentis na ai sejeri mi laik lukim yupela i mekim gutpela wok nau long Galp na bringim ol namba wan sevis we ol pipel i nidim i go stret long haus dua bilong ol,” Mista Abel i tok.

“Mi laik tok amamas long yu, Mista Ken Mulligan long bikpela wok yu mekim long kamapim inap mani long baim dispela sip na gen long putim sampela moa wok long en. Nau yu mas go na pait long narapela wei gen long yu yet i go long ples graun we ol pipel i nidim tru helpim i stap,” Mista Abel i tok.



Ol pipel bilong Baimuru long Galp Provins i wokim namba wan welkam long ol volantia long sip i go kamap long ples.



Namba wan sikman husat i kisim ai operesen insait long nupela klinik antap long medikol sip.



Ol optalmolojis o dokta bilong ai i wokim operesen long Baimuru, insait long nupela operesen klinik antap long sip.



Minista Charles Abel i opim nupela operesen klinik antap long MV YWAM PNG.



# Lyon wantaim tim poro i brukim ol Black Cap, Nu Silan



**NAMBA WAN** pilaia bilong kriket long Australia, Nathan Lyon, wantaim tim poro i daunim ol Black Cap bilong Nu Silan.

Stail bilong Lyon long taim ol i statim pilai i strongim ol poro pilaia bilong em we ol i rausim strong bilong ol Nu Silan.

Tasol, Nu Silan i no wari taim ol i stat long pilai.

Tripela namba wan taim pilaia em McCullum, husat i skruim bal i go long Steven

Smith na Smith i tromoi i go long Lyon na Lyon i skorim 3-pela poin insait long 4-pela ran.

"Pilai bilong mi i no kamap gutpela taim mi kam long sait bilong Australia, tasol mi amamas long sampela senis i kamap long pilai bilong mi na mi gat planti sans nau," Lyon i tok.

"Long olgeta taim mi pilai, mi bai traim hat long kisim ol bikpela ran."

# Anderson na Boult i mekim namba wan kes



**PILAI** namel long Nu Silan na Australia i kamap strong stret long trans Tasman Tes long namba tri de.

Asples Australia i daunim ol batsman bilong Nu Silan bipo long ol i kisim ol namba wan ining ran moa long 3-pela taim.

Tasol, strong bilong ol Blak Kep, Nu Silan, i no daun tumas. Trent Boult na Corey Anderson i kamapim tupela nambawan kes na

rausim ol bowl bipo long dispela resis i kamap. Boult i save pilai wantaim wanpela bikpela hita bilong Australia, Mitchell Marsh. Taim namel long Marsh i save bat na bal i go bek long Boult em i 0.59 seken.

Nau ol bai makim wanpela namba wan i save kes em bai pilai long sama, tasol i gat wanpela moa namba wan pilaia i mas stap long dispela wankain ining.

# Sapota bilong Melbourne Victory i kirapim paia

**OLGETA** sapota bilong Melbourne Victory i kirapim paia long AMMI pilai graun long las wik Sarere nait taim ol Victory i pilai egen-sim ol Melbourne City we skoa 1 sanap olsem 2-2.

Ol i bin kirapim 7-pela paia bipo na tupela long taim ol i pilai. Sampela ol man husat i stap insait long pilai graun tu i tromoi botol i go long golkipa bilong Melbourne City, Thomas Sorensen, bihain long em i stopim wanpela gol we Victory i ken win.

Polis i tok, ol sapota i tok nogutim ol tele-

visen ripota na kemeraman taim ol i wok-about i go insait long stediam na ol i bin rausim 20 pipel long pilai graun.

"Wankain asua i bin kamap long las wik pilai long Etihad Stediam we ol sapota bilong Westen Sydney Wanderers i mekim olsem na nau ol sapota bilong Victory i soim wankain pasin nogut," Sif eksekutiv, David Gallop, i tok.

Ol belhat polis long Victoria i tok olsem sapos ol sapota i go het long kamapim birua pasin em ol bai stopim ol gem.

# Kerber i weitim tropi yet

**SEMPION** bilong Australian Open, Angelique Keber, i wet yet long tropi bilong em long joinim Jemeni bihain long em i winim Australian Open na kisim namba wan gran Slam taitel bilong em.

Bihain long em i daunim nambawan pilaia, Serena Williams, em i les long karim Daphne Akhurst Memorial Kap long hanbek bilong em i go bek long Jemeni.

Em i tingting long salim i go bek long Yurop, tasol em i no go long Jemeni yet.

"Em mas i kam long sampela hap long balus o sip. Mi no save long em i stap we nau," Keber i tokim ol ZDF brodkast.

"Mi lusim dispela tropi long Melbourne bikos em i gat 10 kilo na em i hevi tumas long karim long hanbek.

"Mi gat treking namba na



mi ting olsem em bai kam bek long mi bihain long sampela de.

Wol namba tu pilaia i tok em i no gat inap taim long yusim dispela treking namba long sekim dispela tropi bilong em i stap long we stret.

Kerber i pilaia long Fed Kap Wol Grup long Jemeni na daunim Switsalan long namba wan raun we em i daunim Timea Bacsinszky.

Nambawan pilaia, Belinda Bencic, i daunim Kerber na em i i kisim namba 11 ples long wol renk.

# Arsenal na Tottenham i win



**ARSENAL** na Tottenham Hotspur i win long Premia Lig taitel resis long London.

Danny Welbeck bilong Arsenal i stopim bal long 95 minit na i winim dispela resis wantaim 2-1 na daunim ol Leicester Siti.

Wankain taim, Christian Eriksen bilong Tottenham Hotspur i kikim bal long 83 minit na kisim poin we skoa i sanap olsem 2-1 long Manchester siti na daunim ol birua tim.

Welbeck i go bek na joinim ol Arsenal bihain long 10-pela mun taim em i kisim

bikpela bagarap long skru bilong em.

"Olgeta lain i amamas long Welbeck bikos em i no pilai insait long 10-pela mun na, mipela ting olsem em i go aut olgeta," Menesa bilong Arsenal, Aresen, i tok.

Menesa bilong Leicester, Claudio Ranieri, i tok, "Referi i no mekim ol disisen long stretpela pasin, nogat. Em i rausim wanpela pilaia bilong mipela long i no gat wanpela bikpela asua i kamap.

"Referi i no gat pawa long mekim disisen long dispela kain rot."







# GLASIM RAMU NICO PROJEK



*Wanpela Ramu Nico, Wanpela Komuniti*

# BSK menesmen stap long HSE trening woksop



Ol BSK Menesmen tim i stap long trening.

**OL MENESA**, suprintenden, supavaisa na tim lida bilong Ramu NiCo Menesmen (MCC) Ltd long Basamuk Rifaineri i bin stap insait long wanpela trening bilong helt, sefti, na envairomen (HSE) long helpim ol i wokim gut wok.

HSE dipatmen bilong Basamuk Rifaineri i givim trening we i stat long mun Janueri na bai i go pinis long en bilong dispela mun.

Trening opisa Mista Jonathan Karato i tok olsem moa long 100 bosman meri i kam long trening stat long 8 klok long moning i go inap long 12 kilok long belo taim.

Mista Karato i tok dispela trening i kam aninit long lo bilong kampani na kantri long helpim ol menesmen lain long bihainim na luksave long ol polisi na prosida aninit long Maining Sefti Ekt Employem Ekt, Leba Lo na kampani HSE polisi na prosida.

Em tok dispela trening ol i wokim bihainim laik na toktok bilong Presiden bilong Ramu NiCo, Wang Jicheng long lukim ol lida mas gat moa save long ol nupela Helt, Safeti, na Envairomen, stendat na tu lidim ol wokman wantaim dispela save long wokples bilong ol.

Mista Karato tok tu olsem dispela trening kam aninit long HSE indaksen, hazad identification, fatigue menesmen, Basa-

muk golden lo, fitnes bilong wok, wok sefti analysis, confined space entry, working at heights, permit to work na disciplinary obligations.

Em tok dispela trening bai helpim ol lain long menesmen long save long nupela sefti lo long kamapim gutpela wok bung namel long ol na ol wokman bilong ol.

Em tok dispela em wanpela nupela trening ol i wokim long kisim ol bosman bilong wan wan dipatmen long lainim ol besic sefti lo na long mekim save ol putim wanem ol i lainim long wok ples.

“Planti taim mipela wokim trening i go long ol wokman, na ol bosman nogat, nau em mipela senesim na putim moa save, trening na taim long ol bosman,” Mista Karato tok.

Mista Karato i tok tu olsem dispela trening bai strongim ol lida na mekim wok kam gut na long wankain taim promotim nem bilong Ramu NiCo.

Em i tok dispela trening bai helpim ol bosman long save long mekim wanem samting long wok ples na bikpela samting bihainim sefti rot long mekim gut wok.

“Dispela trening bai helpim tu ol wokman long wok strong aninit long sefti stendet, na wok bung wantaim ol bos bilong ol,” Mista Karato tok.



HSE trening bai helpim ol bosman long save gut long wok.



**135 KM Slurry Pipeline**



**BSK Refinery**



## Badminton Osenia sempionsip i stat

**BADIMINTON Osenia long Oklan, Nusilan, i opim Pasifik Ailan Pilaia sempionsip long Badminton Not Haba.**

Pasifik Ailan Pilaia sempionsip i redim namba wan bekgraun taim ol pilaia long Guam, Nu Kaledonia, Tahiti na Tonga i soim sampela kala bilong ol long trening taim wantaim kosa bilong

Nu Silan nesenel tim, Tracy Hallam na Peter Jensen.

Presiden bilong Badminton Osenia, Geraldine Brown, i tok, "Dispela em i wanpela bikpela sans bilong ol pilaia na edministreta long stap bung wantaim na skelim aida, save, netwok na makim ol yet egensim ol narapela husat i stap long ol narapela

rijon long taim bilong resis."

"Badminton Wol Federesen i laik sapatim Osenia Federesen na em i namba wan samting we mipela i ken wokim wok olsem ol edministreta bilong spot. Mi amamas long Badminton Osenia i kamap wantaim dispela tingting na nau planti meri i stap long dispela trening.



Piksa i soim Pasifik Ailan Pilaia Sempionsip i kamap na long Badminton Not Haba. Planti ol pilaia bilong Guam, Nu Kaledonia, Tahiti na Tonga i stap wantaim long dispela traim pilai.

## Gavman i givim Gems Viles long UPNG

**...PNG Spot Faundesen bai lukautim tupela**

PAPUA Niugini Spots Faundesen (PNGSF) bai lukautim tupela blok long Pasifik Gems Viles long Yunivesiti bilong Papua Niugini.

Minista bilong Turisim na Spot, Justin Tkatchenko, i mekim las toktok taim ol i givim ol fesiliti i go long UPNG long Tunde.

"Ol sumatin bai yusim olgeta blok na PNGSF bai lukautim tupela na ol etlit bai yusim aninit long nupela Spoting Ekselensi Program," Tkatchenko i tok.

Em i tok moa olsem tupela blok em ol bai yusim long ol spot ektiviti olsem ol bikpela etliti trening na kosing bai kamap.

"Mipela i tok klia long dispela tupela blok

bikos i gat tok promis i bin stap pinis bipo long 2015 Pasifik Gems i kamap long las yia," Tkatchenko i tok.

Em i tok moa olsem ol gutpela samting bai kamap long ol etlit bilong PNG i stap long han bilong UPNG.

Presiden bilong Papua Niugini Olimpik Komite (PNGOC), Sir John Dawanincura, i tok, "Ol dispela fesiliti em ol bikpela lukluk i opim dua bilong ol intenesenel etlit husat i lukim gutpela poroman i stap long taim bilong Pasifik Gems.

"Ol sumatin bilong yumi mas lukautim ol dispela haus slip."

## Hekari na Rapatona bai bung gen

HEKARI United na Rapaton FC bai bung gen long Sauten resis bilong Telikom Nesenel Soka Lig long Bisini soka graun long Pot Mosbi.

Dispela em fainal raun bilong NSL long dispela tupela tim bai salensim tupela tim bilong Noten resis long wiken antap.

Dispela em hom na awei gem bilong ol. Hekari i topim lata bilong Sauten na em i kisim rait

long pilai egensim Rapatona long Mosbi.

Lae City Dwellers i topim lata bilong Noten resis na em gat rait long lukautim Welgris Morobe long Lae.

Dispela foapela tim bai pilai senis go kam long 5-pela wiken, na husat tupela i topim lata bai go insait long gren fainal bilong Telikom Nesenel Soka Lig resis bilong 2015 2016 resis.



Kori, top poin skora

## Trening long Badminton i save kamapim sans



Piksa i soim ol lain husat i stap bung wantaim long Kiping Wan Step Pas woksop long long Oklan, Nu Silan.

TRENING long Badminton Osenia edministresen long Federesen level em i namba wan long spot long Pasifik long bihain taim.

Iven Menesa bilong Badminton long Nu Silan na Sif operesen Opisa bilong Badminton Osenia, Julie Carrel, i tok, i gat bikpela nid i stap long edministresen skil long spot.

"Ol pilaia na kosa i save trening olgeta taim tasol, mipela i no save trenim ol menesa o edministreta na i gat bikpela spes i stap long savelain long edministresen long menesim ol pilaia na

iven na mipela i gat dispela Kiping Wan Step Pas woksop," Carrel i tok.

Kiping Wan Step Pas woksop i kamap insait long tupela de na em i Badminton Wol Federesen (BWF) na Meri long Badminton (WIB) amamas program i bungim 16 pipel insait long Osenia.

"Woksop i kamap nambawan we olgeta lain insait long woksop i gat taim long skelim skil na tingting bilong ol," Carrel i tok.

"Mipela i gat ol lain husat i save lukautim ol spot long lokal na rijonal level wantaim i stap long woksop.

"Planti savelain i stap insait long rum long planti kantri we mipela i skelim ol save ol i gat long en na em i wanpela bikpela samting."

Ol bai stap insait long woksop inap long Osenia Miks Tim Sempionsip na Osenia Man na Meri Tim Sempionsip long wik i kam.

"Taim woksop bai pinis, ol dispela lain i ken skruim dispela save long ol pipel bilong kantri bilong ol na kamapim rot na sans bilong ol narapela long bihainim," man husat i go pas long woksop, Marianne Loh, i tok.

## 4-pela junia etlit i winim medal

FOAPELA junia etlit bilong Papua Niugini i gat gutpela wiken long Saut Australian Sempionsip long Adelaide na winim 6-pela gol medal na tupela silva medal.

Ephraim Lerkin i gat 18 krismas i go pas long resis wantaim stail ran insait long 400m hurdle na 400m flet. Em i winim tupela resis wantaim insait long 54.03 seken na 49.66 seken .

Charles Livuan i winim wanpela silva long 100m fainal resis. Em i kam baksait long wanpela asples pilaia, Jack Doney, tasol long 200m resis, Charles i go pas long Jack insait long 22.19 seken na em i win.

Jenny Albert i amamas long 1500m resis we em i klokim namba wan taim em 4minit na 56 seken na win. Tasol em i wok hat long 800m resis long daunim Brooke McGregor tasol Brooke i kamap namba wan insait long 2minit na 20.23 seken.

Rama Kumilgo em i wanpela salensa long anda 18 2000m stipelses resis bilong ol meri, tasol em i kisim wanpela gol medal long resis we ol i bungim ol narapela divisen wantaim na ol i givim.

Rama i winim dispela resis insait long 7 minit na 40 seken, tasol namba wan taim bilong em yet em i 7 minit na 13 seken long

Cairns long las yia.

Nau ol pilaia i go bek long wan wan provins bilong ol long statim skul na ol i lukluk long redi long PNG Nesenel Sempionsip bai kamap long Pot Mosbi long Jun long Kwins Betde.

Presiden bilong etletik PNG, Tony Green, i tok tenkyu long Nesenel Geming Kontrol Bod (NGCB) long bikpela sapat bilong ol long Junia Program.

Dispela Program i strong ol 4-pela etlit kamapim strongpela faundesen long resis long 2016 sisen taim ol i trening na resis long narapela kantri long taim bilong skul holide.



# SP Brewerī i tokaut long SP Spot Awod

Philemon Tame i raitim

**SP BREWERI i tokaut pinis long SP i sponsa olsem SP PNG Hunters inap long 4-pela yia wantaim mani mak i winim K7 milien. SP i tokaut gen long las wik Fonde long SP Spot Awod bilong dispela yia em i K35, 000.**

"SP Brewerī i bilip olsem Spot em i bikpela tul bilong developim ol pipel bilong Papua Niugini na kantri bilong yumi," Menesing Dairekta bilong SP Brewerī, Stan Joyce, i tok. "SP Brewerī i amamas long bringim i kam long yupela dispela namba 24 Spot Awod long luksave long namba wan kala bilong spot long kantri long 2015.

"Yia 2015 i soim namba wan kala bilong dispela kantri olsem em i yia bilong mipela bikos mipela i kamap namba wan long Pasi-fik Gems long medal tali na tu, mipela i kamapim wol klas gem.

"Long dispela Gem tasol, mipela i wet olsem i gat bikpela tok orait bilong awod bai kam long dispela yia.

"Long dispela as, mi laikim olgeta Nesenel Spoting Federesen long makim ol pilaia na opisal husat i helpim long lukautim 2015 resis.

"SP Brewerī i stap sambai long sapotim spot long PNG na namba wan patnasip bilong yumi wantaim PNG Olimpik Komiti (PNGOC) bai strongim mipela long kamapim dispela resis gen long dispela yia. Mipela i givim K35 000 prais mani i go long 12-pela grup.

"Mi strongim mipela olgeta long stap bak-sait long ol spot etlit, kosa, edministresen na spot skraiba bilong mipela na makim SP Spot Awod bilong 2015.

"Mi bai tokaut long ol wina long Awod nait long 14 Me long Crown Plaza."

Long wankain taim, Seketeri Jenerel bilong PNGOC, Auvita Rapilla, i tok, "Astingting bilong SP Spots Awod em i bilong amamas.

"SP Spot Awod em i bilong amamasim ol spot lain husat i mekim gut long spot pilai bilong ol na i gat bikpela luksave i stap long wok ol i bin mekim.

"Awod bilong dispela yia i narakain liklik bikos long PNG i kamap namba wan long 2015 Gems na bikpela amamas i kam wantaim long dispela win PNG i mekim. Long dispela gutpela mak tasol, i gat planti risalt bilong nominesen bai kamap long dispela yia. SP Spot Awod i laikim mipela long amamas gen long dispela gutpela mak PNG i winim."

"Mipela i tenkyu na amamas long SP Brewerī i amamas wantaim ol wina bilong spot na ol i kisim luksave we ol i laikim long en.

SP Spot Awod bilong dispela yia, 2016 em i wankain olsem long las yia, 2015, we ol bai lukluk long 12-pela grup.

- **Man Pilaia bilong Yia** – Intanesenel Pefomens
- **Meri Pilaia bilong Yia** – Intanesenel Pefomens
- **Tim bilong Yia** – Intanesenel Pefomens

- **Nesenel Pefomens bilong Yia** – Dispela awod em i bilong luksave long namba wan kala bilong wanpela lain. Man pilaia, meri pilaia o tim husat i soim kala bilong em gut tru na kamap namba wan tru long ai bilong olgeta lain.

- **Sois bilong Pipel bilong Yia** – Dispela awod em ol pablik bai gat sans long makim wanpela long 4-pela grup i stap antap long winim.
- **Komyuniti Spot Inisietiv** – Dispela awod bai go long wanpela spot namba wan long toktok long sosel isu long komyuniti level taim ol i save pilaia.
- **Junia Man Pilaia bilong yia**
- **Junia Meri Pilaia bilong Yia**
- **Nambawan spot lain wantaim Disabiliti**
- **Spot Opisal bilong Yia** – Awod bilong dispela grup em bilong ol lain husat i kamap kosa, teknikel opisal olsem referi o edministreta.
- **Spot Poto bilong Yia**
- **Spot Midia Awod**

Bikpela wok ol bai mekim bipo long tokaut long SP Spot Awod em ol pablik bai vot long Sois Awod bilong Pipel.

"Mi laik strongim ol pablik olsem ol i mas amamas wantaim na makim man o meri husat i namba wan pilaia na yupela ting em i ken kisim dispela SP Spot Awod," Rapilla i tok.

"Nominesen bai pas long Epril 1 na yupela i mas stat makim ol pilaia o opisal nau.

"SP Spot Awod presentesen bai kamap long Sarere, Me 4, long Crown Plaza na mi ting olsem nominesen bai kamap long mak we mipela i wet long en na mipela bai amamas wantaim.

Crown Plaza em i wanpela bikpela sponsa bilong awod. Ol narapela sapot i kam long Air Niugini, EMTV, FM100, Post Courier, Graffiti Signs, CPL, Theodist na Westpac, na mi tok tenkyu long sapot bilong ol. Ol bai join wantaim na amamas long taim bilong presentesen."



SP Brewerī i bilip olsem Spot em i bikpela tul bilong developim ol pipel bilong Papua Niugini na kantri PNG. SP Brewerī i stap sambai long sapotim spot long PNG na namba wan patnasip bilong SP wantaim PNG Olimpik Komiti (PNGOC) bai strongim PNG long kamapim dispela resis gen long dispela yia. SP Brewerī i givim K35 000 prais mani i go long 12-pela grup. Piksa i soim Menesing Dairekta bilong SP Brewerī, Stan Joyce, i toktok long taim ol i givim SP Brewerī Awod long las wik Fonde. *Piksa: Nicky Bernard.*



Piksa i soim Seketeri Jenerel bilong PNGOC, Auvita Rapilla, i tenkyu na amamas long SP Brweweri i amamas wantaim ol wina bilong spot na ol i kisim luksave we ol i laikim long en. Rapilla i tok SP Awod em i bilong amamasim ol spot lain husat i mekim gut long spot pilai bilong ol.



Piksa i soim Menesing Dairekta bilong SP Brewerī, Stan Joyce, long namel na Seketeri Jenerel bilong PNGOC, Auvita Rapilla, long rait wantaim Peter Tsiamalili Junia, narapela opisa i makim husat lain bai kisim grup namba 4 awod.





**LUKLUK GUT LONG LEK:** Olgeta pilaia bilong Hunters na ol sapota i lukluk strong long lek bilong Jamie Soward taim em laik kikim bal long pri sisen pilai bilong ol long NFS long Pot Mosbi tupela wik i go pinis.



**TRAIM TASOL:** Pilaia bilong Delotte i makim ring taim difenda bilong Theodist i hapim han long stopim em long netball pilai bilong ol long Bisini netball kot.



**RAUSIM YUNIFOM:** Ragbi yunien 7 eksen. Las wiken i nogat eksen long Bava pak.



**REDI LONG RAN:** Pilaia bilong Yokomo i redi long ran go long namba tu bes taim pilaia bilong Bears i putim was long bal. Las wiken i nogat pilai long wanem bikpela ren i pundaun long Mosbi.



**KAM YA:** Yangpela Penrith Panthers pilaia i lukluk long sapota pilaia.





## DIANA

Tuna

Niupela Swit Teist  
Nau Igat Moa Oil!



**PNG's ORIGINAL TUNA**

**PNG MADE**  Manufactured by:  
**RD TUNA CANNERS LTD.**

# Nupela fomet bilong Digicel Kap fainel

PAPUA Niugini Nesanel Ragbi Lig ba yusim nupela fomet o stail long Digicel Kap fainel.

Nupela stail bai lukluk long resis bai kamap insait long 20 wik. Nomol resis bai kamap insait long 16 wik na kwalifaing, semi-fainel na gren fainel bai kamap insait long 4-pela wik.

"Tim we i resis na stap insait long top faiv bai go insait long ol fainel," nupela ed-ministreta bilong PNGNRL, Stanley Hondina, i tok.

Hondina i tok, ol i bin lusim pul sistem na ol bai bihainim olupela sistem.

Bod Siaman bilong PNGRFL i strongim dispela na i tok olsem olupela wei bi-

long lukluk long lata bilong posisen bilong ol tim na em i namba wan long ol nesanel resis.

Olgeta tim bai pilai long Digicel Kap bai gat sans long pilai 16 gem na top faiv tim bai go stret insait long raun tu.

Long wankain taim, sisen bilong ragbi i kamap klostu na plant kampani na seholda i stap sambai na spona long planti klap insait long kantri.

Minerel Risos Development Kampani (MRDC), i sapatim Pot Mosbi Ragbi Futbal Lig wantaim K30,000 long Supa Nain pri-sisen resis bilong ol long Mas.

Menesa bilong MRDC Ekstenel Afeas, Steven Evekone, i tok olsem dispela em komyuniti wok bilong kampani, na em i givim sek i go long Bod Siaman bilong PRL, Doka James Naipo, long Tunde.

Wankain taim Digicel i kamap spona bilong Nesanel Gems Fising Taitel (NGFT) long Rabaul, Is Nu Briten.

Digicel Jenrel Mensesa long Niugini Ailan (NGI), Jack Bourke, i givim K25, 000 sek i go long tresera bilong NGFT, Joyce Bluett, long Kokopo.

Dispela em namba tu taim bilong Digicel long spona long Taitels.



Petterson Elizah bilong Rapatona i traim long straikim bal taim Otto Kusunan bilong Hekari i traim long stopim long pilai bilong ol long raun 2. Dispela wiken bai tupela tim ya bai bung gen long namba wan raun bilong fainel bilong Telikom Nesanel Soka Lig long Bisini. *Poto: Nicky Bernard*



## Taim yu senisim nepi bilong bebi bilong yu Senisim long Sensi

*Good Products, Better Prices, ikam long*

**Johnstons Pharmacies Ltd**

P.O.Box 1066, Boroko, Papua New Guinea.

Tel +675 325 3185 Fax +675 325 0190 Email sales@johnstons.com.pg